

摘藻堂四庫全書薈要

集部

欽定四庫全書薈要

集部

明詩綜卷三十三

四

詳校官編修臣王天祿



欽定四庫全書薈要卷二萬五百六

集部

明詩綜卷三十三

翰林院檢討朱彝尊編

用
十首

用字行之吳江人弘治壬戌進士除行人授南

給事中陞廣東左參議遷浙江按察副使改山

東歷福建按察使河南右布政使以副都御史

撫南贛召還理院事陞吏部侍郎尋遷南京右



都御史進工部尚書改刑部復召入爲左都御史秩滿加太子少保轉吏部尚書卒贈太子太

保謚恭肅有白川集

王道思云白川俊才博學橫行制作之林王伯穀

云公詩渾而雅清而質靜志居詩話白川十齡能畫長師石田翁得其指授詩則別裁風格取法杜陵集中詩云畫品仍游藝詩家特擅名丹青乃餘事金石自希聲散地方盤礴諸公孰老成輞川稱二絕早晚慰平生蓋以摩詰自喻也余嘗見公畫龍戲浪穿山蜿蜒升降百年絹紫雲霧猶濕至寫平坡放犢亦不減史道碩厲歸真乃知公藝事兼能不惟以經濟文章重也

清都

惟昔游清都眷茲固難忘此日復何日真宰垂譙光合
沓來天人羽儀紛成行被髮乘麒麟赤脚踏鳳皇層霄
何鬼鬼瓊宮互相望六丁啟九關稽首朝紫皇紫皇顧
之笑置我玉座旁當筵舉北斗爲我酌酒漿一酌好顏
色再酌生樂康羲和鞭白日回車息扶桑夜半聞天雞
九州但茫茫

思古

古人不可見要見古人心羲皇日已遠河嶽徒高深焉

知千載後無人復思今爲君歌所思清風激商音

恥菴

子車古有訓人不可無恥悠悠下千載聞者乃興起清
風濯厚顏伊人欲何俟西山伯夷薇東海魯連水願言
謝賢達毋獨爲君子

謝趙宗伯惠米疏

一行作法吏俛首事案牘凡百愼期會惴惴憂覆餗朝
廷務寬大幸不蒙顯戮奪俸十二月一千九百斛平生

媿素飽遠謀鄙食肉薄罰分所甘入市求脫粟同年松
雪翁早歲辭厚祿有田西湖濱耕穫任僮僕豈惟充倉
箱亦以給賓族使者持書來顏色照牆屋傾奩流白脂
粒粒如選玉病夫笑開顏一月噉糜粥漑釜汲新泉爲
報午炊熟推枕加一餐屬厭捫我腹勿藥信有喜便可
謝休沐尚懷緇衣詩爲公且三復

耕雲

桐丘先生笑開口問我湖田不知畝一卷神農百穀經

今日居然落我手農夫十耦牛十角公家什一我什九
大田之稼歲十千與公歲歲爲春酒

聞詔

哀痛開新詔孤臣海上還塵沙新肉骨涕淚舊江山罪
薄神明後生餘齒髮間君恩知莫報益厚野人顏

厓山 二首

天王海上難爲國猶恨祥興似景炎千里有心求馬骨
六宮無力挽龍髯已聞南劍仍開府何事前軍早解嚴

欲把椒漿酹坏土厓山風急雨纖纖

何人決策幸揚州可是諸公爲國謀但肯十年嘗越膽
不妨九世復齊讐中原肉骨餘孤子諸將功勲待列侯
聞說舊時南渡後有人進講魯春秋

吳太常諸公九日前一日登清涼寺次韻

清秋何處迴高眼山寺遙臨江水濱滿地黃花聊避俗
誰家白酒未嘗新可憐明日是九日爲問閒人能幾人
且與山靈修故事已傳西北靜風塵

秋思

黯黯湘雲斷九疑娟娟山月照峨嵋
西風楊柳渾搖落莫向江亭賦別離

魯鐸 三首

鐸字振之景陵人弘治壬戌進士改庶吉士以
編修使安南累官南國子監祭酒贈禮部侍郎
諡文恪有蓮北使交東廂諸集

李本寧云先生思深而不苦骨

勁而不屬情婉而不蕩事核而不僻
氣平而不餒山林廊廟各適其體

詩話文格以清德稱恒曰人嘗戲得菜根則百事可作君子以為名言歸田日築已有園於宅東賦之曰其蔬則有芥苜蓿芡蘆菹菠薐芥苗嶺表山藥土中春間剪韭秋高折蔥豆多豉扁瓜備西東瓠較五石為劣芋薺蹲鴟狀同蘇子瞻所云我與何曾同一飽不知何苦食雞豚也又曰安予分之所遇予求予心之所好苟沒世其有稱予奚外身而有技又曰人生信亦有涯予嗟世事之莫盡往者幸於免咎予來者可諉於余分達生之言猶恐脩名之不立庶異乎莊老之指矣

古塔灘

古塔灘注山窪飛湍屈曲如奔蛇中流惡石故激怒跳

珠濺雪紛交加鏘鏘爭走萬甲士刺刺倒露千狼牙官
舟一葉百夫挽安危祇與毫釐差我時攀巖過絕壁四
顧莫非援所家倦來坐石却俯看握拳吐舌生咨嗟九
龍山史好奇甚哦詩但道山水佳更嗔來日舍舟去磨
崖不及親鐫搨

鳧州即事

見說瓜堪摘閒過洲上來小船風打去半日未能回

莊居漫興

田間事事雖畢村裏家家未閒唯有東湖隱者但從屋
後看山

徐問 五首

問字用中武進人弘治壬戌進士除廣平推官
召爲刑部主事轉郎中出知登州府調臨江遷
長蘆鹽運使歷廣東左布政以右副都御史巡
撫貴州拜兵部侍郎改禮部進戶部尚書謚莊
裕有養齋集山堂萃橐

俞汝成云尚書詩不刻
鏤以爲工然辭旨平正

足以
諷人

詩話尚書五律清高深穩歌行如山雞野鶴自
啼舞赤日照耀神仙宮懸厓石壁置堂觀凌虛
下瞰馮夷宮寒潮涌日下孤島潮
回響聒晨昏鐘頗具謫仙風骨

和孫太守朝望登毗盧閣

與客登層樓鉤簾瞰幽壑秋色動遙林千厓自空廓俯
視清川流或見沙鳥落涼飈拂襟袂閒雲漾飛閣書臺
藤蘚荒伊人久云邈餘香有叢桂三鶡風前萼

歲暮

海濱歲云暮草木尚莽蒼玄枵隱化機羣蟄寂餘響誰
云果不食有復繼茲往充然天地心生息在反掌况乃
青陽交和風遍穹壤陽德嘉再亨吾亦觀吾養重闕靜
喧囂性定道心長百年日斯征撫事集遐想惟當務崇
德不媿茲俯仰

夜發蕭灘

驛小臨官道沙長帶水城山於雲處沒星過渡邊明瑣
瑣非初志營營慨此生北堂凝望遠秋日萬重情

卧病

竟日還欹枕秋風動客歌
青山愁處遠白髮病來多
生計只書卷故園空薜蘿
時時問雙鯉欲寄洞庭波

早發煙渚

雨色江頭樹青煙夾路長
遠邨迴寂寞白鳥去微茫
楚客歸何日春江正可航
因思雲嶠句心折不成章

何塘二首

塘字粹夫懷慶衛人弘治壬戌進士改庶吉士

授編修轉修撰謫開州同知稍遷東昌府同知
陞山西提學副使改松江擢南太常寺少卿署
翰林院事歷工部右侍郎改戶部復改禮部陞
南京右都御史贈工部尚書謚文定有柏齋集

詩話文定講學兼明禮儀樂律其撰許魯齋祠
堂碑稱魯齋以躬行爲急而不徒事手語言文
字之間道以致用爲先而不徒極乎性命之奧
且言近世之士有志乎聖賢之道必留心性命
至於修齊治平之方義利取舍之分多忽而不
省夫性與天道夫子罕言而四教之施必以文
行忠信則其先者可知已持論甚篤實詩特其
餘事然如九日和韻從肺腑中流出此等作無

論字句之
工不工也

和郭杏東九日韻

重陽細讀黃花句，懷抱因君一暫開。
杜甫當年長作客，陶潛此日定銜杯。
殊方久廢登高興，青眼誰憐濟世才。
北望親闈腸欲斷，塞鴻頻到少書來。

題淮浦卷

長淮之水東南流，美人家在淮上頭。
滄波碧石有深趣，朝史暮經無外求。
東風側耳聽黃鳥，夜月卷簾招白鷗。

畫圖一見擬相訪何處元龍百尺樓

李時一首

時字宗易任丘人弘治壬戌進士累官少傅兼
太子太師吏部尚書華蓋殿大學士贈太傅謚
文康有薇花堂橐

夏日偶書

卜居地愛城西僻野水春來自作渠戶繞山光堪對酒
園收柿葉好供書青林雨過煙蘿濕碧沼雲生石竇虛

長者不聞門外駕小庭新草手閒除

葉相一首

相字良臣江都人弘治壬戌進士歷官刑部侍郎贈右都御史

史江皋約游芙蓉莊阻雨

細雨芙蓉徑衝泥客到稀橋分平野闊江入曲池微花怯寒輕墮鶯愁濕不飛高雲掩片月容易送春歸

林茂達一首

茂達字孚可莆田人弘治壬戌進士官至大理
寺卿有翠庭集

讀淮陰侯傳

帶礪盟寒霸業空將壇寂寞幾西風中原草樹埋秦鹿
雲夢旌旗出漢宮人代古今雙淚眼王侯天地一樊籠
赤松始識神仙侶圯下無慙黃石公

王尚絅 二首

尚絅字錦夫邾縣人弘治壬戌進士授兵部主

事改吏部歷員外郎中出爲山西左參政調四
川引疾歸補陝西遷浙江右布政使有蒼谷集

李時遠云蒼谷

詩嚴整可觀

詩話蒼谷結仲默爲姻婭訂獻吉德涵子衡庭
實粹夫諸君爲杵契然其詩如入邪徑狹巷未
達周行較之升堂入室之彥尚遠馬伯循序之
止許其能取友可謂善於立言然其身後鄉里
私謚曰貞孝文子則文采風流雖不及諸君而
孝行有足尚者獻吉贈詩云宏詞振宛洛一一
中音呂未免
阿所好也

土門

蒼蒼土門口日出逢樵叟問爾何事來山中苦無酒

蔣仲

舒云五絕如此一氣者勝

送白德明之太原

十載高名專百里舊遊山水入新詩雲中樓閣開王屋
春水田疇繞晉祠

陳震 三首

震字聲伯德清人弘治壬戌進士刑科給事中
正德初謫判六安州歷山西提學僉事有水南

集

墨布袍

游提刑抗節不仕

墨布袍粗且黑，心中事背上墨。宋時遺黎元，版籍寒暑晴雨寧。暫釋直教蓋棺覆我首，領纏我骨死不在閩廣。生苟依木石，安能易彼章與黻。俛首躬身福州伯。

銀簪詞

沈回奴死節

爺孃養我身從小不出戶銀簪雖掠鬢荆釵未成婦蘆
港深深孰來此擾擾紅巾照溪水無門別逃避有計深
拜跽奴願從將軍奴尚真處子辰良日吉禮所重野合
私從世應鄙紅巾不疑身免辱愛生者衆愛死獨銀簪
不刺股銀簪不錐目咽喉三寸氣出入此氣一斷難再
續君不見元運衰海宇析人男子宫柱國抱持馬足慌
拜賊頭上朝簪長一尺

潭水清

洪春春死節

儂本村田居無城又無郭賊多孰備禦賊少亦驅掠阿
爺到新市說有官軍駐官軍快殺賊殺賊賊當懼從爺
提攜行忍死事遷寓一朝賊四合兵將走不顧東鄰金
帛盡西舍娥孃去獨存儂身走無及道旁空屋爺教入
兔面始藏伏援臂已持執驅至岸拉上船回思死清水
勝活污瀆閒仙人潭深莫比一生事一口水

詩話水南博洽著聞留心風教詩不苟作予錄
其三篇稍加刪汰墨布袍者宋咸淳進士福建

提刑德清游汶魯望所服元初以遺老薦授福
州總管固辭不就題袍背云前宋遺民今爲百
姓雖雨晴寒暑未嘗解脫卒塋東山銀簪詞者
德清女子沈回奴際元末兵亂匿蘆港中賊獲
之求合從容語曰我閨女也必擇日具禮乃可
賊信之攜至營是夜拔頭上簪刺喉死潭水清
者歸安女洪春春元至正十八年兵亂父引之
避居新市賊至匿空舍中賊入將逼之女投柱
死三事國史失
載因具詮之

孫偉 二首

偉字朝望清江人弘治壬戌進士官至鶴慶知

府有鷺沙集

俞汝成云鷺沙詩有自得之趣而濟以精緻信其可傳

詩話鷺沙詩格蒼老所惜未醇句如花邊釣艇
閒依岸葉底潛鱗不避人三日泥穿東郭履六
年人住楚江城屠蘇又醉王正月童子不嫌吾
舊廬澗底山泉攜甕出籬邊春雨課兒鉏大江
水漲孤城小遠道天寒一鴈稀夜久星河在檐
宇天寒鴻鴈叫滄洲屋邊晴雨間禽識徑裏風
泉老竹當具饒骨力

喜雨應吳大參

山下荒畬勢若焚山人望雨戴爐薰夜深初見月離畢
曉起忽傳江發雲造化驅雷從地出蛟龍卷海上天分
甌汚擬遂明農願敢作爭桑惱使君

留酌彭敬之

清江一月風兼雨那復過從問所親久別那堪經亂日
相逢還阻看花晨且將決戰東湖略細語躬耕南畝人
邂逅歸舟莫催急水煙猶殢岸頭津

俞泰一首

泰字國昌無錫人弘治壬戌進士歷官山東參
政有芳洲漫興集

題扇寄邊華泉

木葉迎風下孤亭傍水開何時尋舊約載酒過江來

范嵩一首

嵩字邦秀甌寧人弘治壬戌進士累官南京工部右侍郎有衢村集

過太平府有感

滿汀芳草夕陽斜長恨春時不在家昨夜月明鄉夢醒
杜鵑啼上杜鵑花

徐泰 三首

泰字子元海鹽人弘治甲子舉人授桐城教諭
改蓬州學正遷知光澤縣有玉池橐

賣婦謠

東家賣婦江南去西家賣婦江南去肝腸寸斷兩不知
涕淚并作河流注哭聲震天天地悲道傍觀者各淚垂
人生不幸遭此時他家食却五歲親生兒

西陵峽歌

兩山夾江如壁立千尋萬尋青鐵色江流如龍山罅來

動地雷聲喧白日山高不見飛鳥過舉頭青天一尺多
蒼藤古樹翳滿目沿厓亂石其奈磊砢磽巖何嗚呼峽
中之險險莫比昔嘗聞之今信矣商人重利却輕生吾
獨何爲亦來此黃陵廟下不可游空舫塌洞尤堪憂十
前九却過一險百夫力盡顛厓頭垂堂遠遊古所戒靜
言思之心膽賊中流欲歌行路難哀援又起寒煙外

枝江道中

水落枝江道風高歲暮天挂帆煙雨裏惆悵入川船

顧鼎臣 一首

鼎臣字九和崑山人弘治乙丑賜進士第一累
官少保兼太子太保禮部尚書武英殿大學士
贈太保謚文康有未齋集

憫雨

丁丑夏六月災變良有由不雨土膏竭萬木焦林丘一
雨浹旬朔日夜乃不休七月日五六氣候如高秋雨意
轉蕩瀟勢欲漂燕幽街市潢潦集淺深可方舟汨沒閭

閭失縱橫盆盎浮薪炭且莫購安辦米與甦哀哉彼窮
民衣食恃耕疇黍稷方垂花俄頃沉淵湫所存復幾何
公私尚誅求老羸力不克輾轉壑與溝妻孥互牽抱蓬
垢同繫囚且忍頃刻活未暇來日謀救死及扶傷哭聲
動城陬雞犬寂不聞但聞叫鵲鷗此變未可輕廣闊被
數州大都尚若斯僻壤焉能留少壯罷鉏犁行復事戈
矛細民本蟣蝨反面成虎彪往事足懲創弭變期交修
我時卧邸舍霑濡到衾裯起坐念蒼生汎瀾涕難收願

水洩尾閭上通天河流河邊有天孫來夕會牽牛肯以
下界苦戀與上帝不天聽或在茲蒼生其有瘳

謝 丕 一首

丕字以中餘姚人太傅遷子出嗣叔選弘治乙
丑賜進士第三除編修忤劉瑾削籍嘉靖初起
充日講累官吏部左侍郎

行樂歸

徙倚亭欄外何人共此杯春風知我意吹送小舟回

湛若水 二首

若水字元明增城人弘治乙丑進士改庶吉士授編修歷侍讀陞南國子祭酒禮部侍郎進尚書改兵部謚文莊有甘泉集

顧玄言云先生詩
韻藉逸秀得唐人

古澹
處

詩話文以載道詩以言志不詭於道勿納於邪可也談理學者必借詩爲證道之言若禪家之拈頌說偈者然吾不得其解也司馬遷曰古詩三千餘篇孔子刪取三百五篇皆絃歌以合韶武之音則匪獨闕雉鹿鳴文王清廟也凡鄭衛之詩皆合於韶武者也屈子之離騷至欲詒高

辛之鳳皇留有虞之二姚捐珎於湘君湘夫人之下女其爲無禮甚矣然志出乎正覽者謂其爭光日月杜子之詩篇至比母后於哀姐而顯斥其明眸皓齒目椒房之戚爲麗人而形容及意態肌膚其亦不遜甚矣然志出乎正論者謂其一飯不忘君是說詩者亦觀其志之所存而已不必盡出於道德之言也元豐而後理學風雅截然爲二大約多祖擊壤言情之作置之勿道如傍花隨柳何害於道程伯淳恐人之議之也緊接曰時人不識予心樂醉擁如花何害於情黃才伯恐人之議之也亟注曰欲盡理還之喻古之所謂發乎情止乎禮義者今之所謂發乎情必戾乎理學者也甘泉論詩推崇定山白沙以定山爲精金千鍊謂詩法如是學者亦必出於是吾誠不得其解也

贈劉都閫

樓船簫鼓動秋清
劍氣寒光下紫冥
想得將軍經略暇
時時騎馬看潮生

送鄭汝高尹黔縣

黔縣縣前江可憐
青山四塞上通天
長官公暇鳴琴坐
不管桃花開縣前

顧應祥 一首

應祥字惟賢長興人
弘治乙丑進士累官南京

刑部尚書贈太子少保有崇雅堂集

詩話尚書仕不廢學含經約史維日孜孜其在
滇藩刊草廬吳氏尚書纂言萬里遺書鄭端簡
以序大商榷手蹟予及見之端簡爲塗乙數語
并疏大旨於簡端本今藏予家集中詩不無蕪
累王元美許其似
白太傅亦微辭也

海寇

高皇啟天運龍飛當九五萬國盡來王惟詔絕倭虜惡
其性狡猾外服心跋扈所以備之嚴兵防遍斥鹵後雖
容入貢來往亦有數奈何海濱氓趨利者蠡午自決中

夏防勾引島夷部偵知我虛實公然肆侵侮攻城殺官
吏燎原損稂黍剽掠辱閭閻屠僇及乳哺結巢據險要
呼類益屯聚承平紂綺習詎識干戈苦聞風輒先奔隋
塹等盲瞽去年樵李敗慘極不忍覩浮骸滿溝渠行不
通商旅堂堂會城中三司列文武長驅且深入無人敢
撐拄坐令北關外一炬成焦土脇從半吾民如以翼加
虎元帥乃書生市兒充行伍縱有百萬家竟不能穀努
見說賊兵來城門已先杜十室九逃竄止遺甌與釜算

緡科兵田招兵沿門戶東南財賦區中病在肺腑天子
怒按劔新命改督府彼倭干天憲凶殘久自沮會見一
埽平四方盡安堵

崔銑 一首

銑字子鍾安陽人弘治乙丑進士累官南京禮

部右侍郎贈尚書有洹詞

穆敬甫云文敏著洹詞人知工文而不知

工詩近體豪雋奇

古足與李何方駕

詩話洹詞不載詩篇其見錄於選家亦少予得
公手蹟寄張子醇方伯者有上陵下陵諸作錄

秋風一首存豹一斑若云與李何
方駕則未見其全不敢臆定也

秋風

秋風何蕭蕭夜夜動林莽除畹本種蘭奈此艾蒿長

陸深五首

深字子淵上海人弘治乙丑進士改庶吉士授翰林院編修遷國子司業進祭酒謫延平府同知陞山西提學副使改浙江歷江西參政四川布政使召爲光祿卿改太常卿兼侍讀學士陞

詹事府詹事卒贈禮部右侍郎謚文裕有儼山

集

費子和云陸公詩歌雅而莊婉而諷左遷以後略無感時憤俗之意觀其發教嚴詩云去

留俱有適吏隱欲中分此其心豈常有怨尤邪

王元美云陸子淵如入貴官作文語雅步雖

自有餘未脫本來面目陳卧子云子

淵氣尚清拔學非深造多輕淺之調

詩話儼山詩其原出於大歷十子平衍帖妥如

設伊蒲之候方丈當前雖遠羶腥終鮮滋味至

其折衷經史練習典章其所記載可資國史采

擇昔朱晦翁幾葉正則知古而不知今陳同甫

知今而不知古惟許已伯恭克兼之儼山亦可

無愧伯恭矣若夫正書似顏尚書行書似李北

海英雲卿之論謂風力實出趙吳興之上自董

尚書墨蹟盛行而儼山遂爲所掩然尚書論書

法推爲正宗世有張懷瓘估
直朱必定取董而遺陸也

武鄉山中晚行

落日下西崦餘光在高樹水流青山中人行白雲處

歸塗絕句

日落山煙紫林深暝色寒殷勤問前路今夜宿新安

春日雜興

綠楊如綫草如茵紫竹肩輿白氎巾不是爲春禁不得
老來心緒最憐春

中歲

中歲山林頗有情
柳條花萼弄春晴
日長無事江門外
獨立斜陽看水生

留別所知

世間好事一百一
春日麗辰三月三
此地故人還故國
他時江北望江南

張邦奇

八首

邦奇字常甫鄞縣人弘治乙丑進士累官南京

兵部尚書贈太子太保諡文定有集

感遇

我昔見嫩人婉孌容色好
貽我瓊玉鉤願言佩終老
我來既已晚美人逝不返
薄帷明月夜使我心悽惋
芳蘭何萎蕤采之將遺誰
感彼嫩人贈銜恩空淚垂

迎春

閉門終日坐不知天地春
鴻鈞一以動百物相鮮新
憶昨凋落時梅李各有仁
如今發生氣亦復資絪縕
達人

均四海愚者分比鄰嗟予二三友歡會當及辰我有一
尊酒可以陶吾真

送張君用之鶴慶

燕臺一尊酒送爾滇南行風塵萬餘里極目難爲情故
人倏已散落日元蟬鳴曾無別離色可以觀平生

送王宜學編修謫官三河驛

若華照四海靄靄凝浮陰揮之不可得憂心日欽欽嶺
南多嘉樹隆冬見青林去去遠垢氛聊以澄煩襟綠衣

無怨言白華多苦心願子崇明德永言終令音

遊方廣寺簡嚴太史

勝會臻名流竒探極幽藪但覓方廣真不問厓蹊陡越
險倩松喬躋危病賁黝巖絕疑天低阬深詫坤厚陰風
潑地寒清溪挂厓吼燕石晴復飛蚪藤凍還走羣峰角
低昂亂石相牝牡獲勝古所歡行疲君莫咎君看廢寺
中釜塵僧骨朽朱張獨何人智勇名斯久

祝融峰

危峰踰萬仞衆峰不敢竝到此得大觀超然稱心境捫
星或低頭望日不引領分明見員儀恍忽凌倒景時月
當坤陰霜林肅而靜我欲回陽春叩此祝融頂

鷹逐鷺圖

我觀羣鳥中除却蒼鷹盡凡羽君不見黃金眸白玉距
凌空一下急于雨鷺鷥何不早竄伏到此驚奔向何許
憶昔在林臯翻飛矜羽毛羽毛雖好不中用憑君識取
真英豪

送王石沙侍御按閩

金門冠蓋下晴曛一騎青驄萬里雲
明到閩山正秋色玉簫吹向武夷君

徐縉 三首

縉字子容吳縣人弘治乙丑進士歷官吏部左侍郎兼翰林侍講學士諡文敏有集

詩話文敏與獻吉仲默昌穀俱深攬環結
縉之好詩雖平行較王錦夫孟望之似勝

送徐昌穀使湖南 二首

鴻鴈惜離羣
嗷嗷鳴不已
如何平生親
奄忽去千里
懷哉可奈何
王事有端委
城南走相送
意逐東流水
駕言度前岡
迤邐歷河漢
道路阻且長
嚴程自茲始
贈子以瓊瑶
酬我一端綺

昔與子北征
嚴霜拂貂裘
今子遽行邁
春水浮蘭舟
永懷會晤好
重此離別愁
出門望千里
楊柳條已抽
想見歲月積
回首瀟湘秋
遙窺九疑山
近賦黃鶴樓
嗟哉滯一方
安能從子游

感遇

朝旦別燕京景落憩吳船揚舲發潞渚伐鼓信洄沿芳
蘭已衰歇歸鳥紛飛旋颭颭風揚沙皚皚冰塞川黃雲
結四野白霧縈三邊顧瞻望城闕參差御飛軒撫化心
愴惻覽物淚潺湲行行指舊山稅駕從所便

周 廣 一首

廣字充之崑山人弘治乙丑進士以監察御史
劾錢寧貶懷遠驛丞移知建昌再謫竹寨驛丞

寧誅復官仕至南京刑部右侍郎贈右都御史

有玉巖集

遺辰州張尹

江口風逾急孤舟日已西多情山上月相送過辰溪

黃鞏

七首

鞏字伯固莆田人弘治乙丑進士官大理寺丞

天啟初追贈少卿謚忠裕有後峰集

林雨可云先生詩直

而多思澹而自然

山中吟

春山澹無姿春雲濕將雨隔林有人家知是雲深處雲
深山徑微欲往疑無路不如山中人只在山中住

襄陽即事

斷岸移沙觜江城倚漢濱山光餘照日花豔近逢春勝
地登臨遍東風感慨新不知耆舊傳更有姓龐人

冬日書懷

獨立蒼茫裏悠悠一轉蓬風塵連歲儉湖海又塗窮野

曠飛鳶急沙寒落鴈空思君何處所斜日下簾櫳

謁穎考叔墓

封人千載後坏土覆孤墳天下誰無母如公亦愛君黃
泉歌大隧白谷翳寒雲曠世子心感西風日又曛

閔子祠

青山環故冢古木護朱闌師友諸科最親闈一子寒里
名今不改廟貌久猶完茆土雖封費終非季氏官

偶成

三十功名四十歸山林已自落塵機罪當萬里投荒服
恩許終身作布衣雨宿風餐歸路棘東封西祝諫書稀
扁舟不道江湖遠回首燕雲是帝畿

芋園發舟

西風又作扁舟客沽酒沙頭對夕暉岸轉青山背人去
江空獨鳥向人飛十年塵迹今衰鬢九月嚴霜尚袂衣
望極紫宸天萬里未容回首戀柴扉

孟洋 三首

洋字望之信陽人弘治乙丑進士除行人選爲
御史坐論張桂下詔獄謫桂林教授遷知汶上
縣再遷嘉興府同知陞湖廣僉事引疾歸旋起
山東僉事進參議轉陝西參政拜僉都御史巡
撫寧夏改理河道終南京大理寺卿有有涯集

杜子材云望之標格氣骨頗有矩矱王元美
云孟望之如貧措大置酒寒酸澹泊然不置腥
羶穆敬甫云孟詩逸氣超羣橫不可制與仲
默同生一區足稱二美顧玄言云大理調雅
詞綺高響奇絕彷彿天台石梁羅浮水簾黃
清甫云洋詩善叙事長歌宛轉相屬而意不竭

但少
道耳

詩話左孝廉舜齊獻吉外弟也孟大理望之仲默外弟也左詩近膚孟詩太淺比於郎伯邈若

雲

淵

贈朱生

與子別離時乃在瀰水陽
瀰水東西流往櫂無回檣
還顧桂山隈城闕鬱相望
修衢帶廣陌車馬如雲翔
子居貧士里散帙空盈牀
歲久塗路仄思心阻且長
一朝時運會奮飛游帝鄉
戢翼復南旋問我來建康
驚喜如夢

寐顏色各已蒼衷情未云極
話言詎能詳行行度湘川
采掇多蘭芳無以遐遠故
聊寄莫相忘

九日次邊青厓太常韻

落帽憐高興銜杯意轉哀
葉辭霜後樹人上雨中臺
爲客悲秋盡思鄉見鴈來
百年幾佳節又負菊花開

荅高大和侍御寄書

舟過衡陽鴈已疏經年那得故人書
一封忽漫來何處
千里殷勤問謫居海上青驄遙羨汝
湘南芳草正愁予

清秋直北朝星斗回首雲山萬疊餘

殷雲霄

七首

雲霄字近夫壽張人弘治乙丑進士授靖江知

縣調青田陞南京工科給事中有瀛洲芝田二

集

朱中立云石川詩得初唐體裁海嶽之奇氣也王元美云殷近夫如越兵縱橫江淮間

終不成霸

穆敬甫云殷君與太白山人多倡

和宜其風度似之

俞汝成云石川氣逸才雄

思奇語勁騷壇一勁敵也

顧玄言云給事菁

藻時髦才情適麗

李時遠云近夫豪雄逸宕

不羈

之才

詩話近夫如傳寫手欲開生面而神采未
工然風格自存終不作鋪着苦眼求似

感遇

孤鳥失其林日暮鳴且飛風枝棲未定搖搖將安歸中
洲有芳草慘澹少光輝舟楫蕩流波根株苦無依悲此
遠征人三代故鄉違萬里長塗間安知身是非東海有
釣綸西山可采薇悠悠迷方子誰能識其幾

長店

大風揚塵沙白日昏林丘前途浩莫辨聊此停吾舟崇

岡蹲狐狸高樹鳴鷓鴣我欲驅之去惜哉無弓矛鸞虞
嗟已矣此輩今何求

夜登定山

朝泛桐江水夜躡定山石延蘿踞虎豹噓波動潮汐俯
闕馮夷宮疑入羽人宅林靜江有聲雲昏岸無迹懷哉
坐哀聽戚矣闕遠靚風勢依峰峻月色連江白飛鴻鳴
遠浦潛蛟舞深澤飄飄千里舟脈脈獨遊客乘桴嗟有
志棲巖悲失策薄宦竟何有幽期誰與適覺迷道有獲

含欲情無逆眷言詠白駒聊以慰今夕

宿江陰得太初書

侵晨發毘陵薄暮及江陰積雪明高原歸鳥喧前林孤
舟風雨夕大江雲霧深遙遙越鄉感脈脈游子心美人
隔江浦寤語安可尋情至物有合離析領瑤音愛賞欣
自古慕羣悲獨吟寄言狂歌客一尊待吾斟

虎丘寺

落日青山外浮雲滄海邊江山皆勝迹樓閣自人天碧

草生公塔丹厓陸羽泉平生獨往志欲老翠微巔

杜楊劉三君子攜酒過官舍次杜韻

縣齋微雨過蒼苔越客芳尊向晚開池畔好風驅暑去
松間明月逐人來三年戎馬身無定千里鄉書鴈未回
痛飲狂歌聊復爾不堪愁病兩相催

漫興

二月澄江春水深北孤山頭雲陰陰北孤山頭雲作雨
我欲渡江愁我心

倪宗正 二首

宗正字本端餘姚人弘治乙丑進士選庶吉士
出知太倉州入副武選諫南巡受杖知南雄府
有小野集

題網魚圖

白白江波紅尾魚蒲花初發柳花疎江洲日暮忘歸去
江魚上網不知數風雨欲來猶不來簞笠且挂磯頭樹
爲顧新山題画用思道韻

久住水東溪欲往水西去一夜春草生溪路無尋處

孫泰一首

泰字時寅歸安人弘治乙丑進士官刑部郎出知成都府改兗州有龍溪藏豪

詩話龍溪守兗日康陵南巡中涓苛索供億請以身充役時同里蔣公瑤守楊州衛民甚力扈從貴人相誠謂湖州人難犯及龍溪卒檢視篋中僅圖書數卷衣數襲而已蔣公廉節略同今兩家子姓氏微已甚信夫廉吏不可爲也

西江道中

九月菰蒲色尚青芙蓉深淺瀟沙汀一行新鴈從天落
我欲圖歸作画屏

索承學一首

承學字遜夫邳州人弘治乙丑進士戶部郎中
有桐岡集

西樓晚眺

在家無事不勞生暫倚危樓看夕晴雲裏樹含山外寺
渡頭人語水邊城荒村茅屋秋砧早野店漁家晚炊明

吟罷新詩還自和
西風吹落塞鴻聲

安磐 一首

磐字公石嘉定州人弘治乙丑進士改庶吉士
授兵科給事中進都給事中議大禮被笞免官
萬歷初追贈太常少卿有頤山集

詩話公石集句最工惜所著頤山集詩話罕傳
楊用修述其論詩之旨云唐之名家自立機軸
辟猶羣花各有丰韻乃或剪綠以像生或繪画
而傍影終非真也又云論詩如品花木牡丹芍
藥下逮苦楝刺桐皆有天然一種風韻今
之學杜者紙牡丹芍藥爾其說足以解頤

題画

百里同雲雪滿篷冥冥那復計西東
輕舟不畏邪溪水朝定南風暮北風

張寬二首

寬字德宏太倉州人弘治乙丑進士廣東按察

僉事

周復俊云張公不以詩名而標韻自遠

大駕南郊

行殿彤雲合晴郊綵仗攢鑪煙香細細羽扇影團團禮

樂從周典威儀盛漢官帝壇風露肅轉慮聖躬寒

早朝

曉日含青陸疎鐘散紫煙聞雞頻視夜騎馬獨朝天馳
道千官肅梯航萬國先御爐香不斷長繞翠華邊

周宣
一首

宣字彥通莆田人弘治乙丑進士除常德推官
擢監察御史巡按山西諫南巡不死後出為山
西提學副使遷廣東按察使坐事免有秋齋集

聚書樓

樓外長河練帶斜
河頭水氣欲蒸霞
誰家艇子捕魚過
衝落小桃一樹花

林文纘

一首

文纘字德緒候官人
弘治乙丑進士歷官湖廣
布政司參議有漱芳集

再入計

冒寒發江郭隨衆述所職驅車策駑馬夙夜不遑息行

山歷峻阪遡川履深澤昔來楓葉青今往霜林赤郡縣
本舊游轉盼非疇昔新知多遷除故吏半更易惆悵時
物移銅符猶未釋服役職所任詎歎如蓬跡耿懷抱微
誠天顏期再覩

田登二首

登字有年長安人弘治乙丑進士河南參政有
偶山集

明妃曲

明妃遠嫁靜邊塵一曲琵琶萬里身惆悵西風千古恨
封侯談笑是何人

巴東峽

晚泊孤舟春水生遠灘雙檣片帆輕消魂一覺鄉心夢
卧聽四山風雨聲

方獻夫一首

獻夫初名獻科字叔賢南海人弘治乙丑進士
改庶吉士累官少保兼太子太保吏部尚書武

英殿大學士贈太保謚文襄有西樵遺藁

閒居和杜子美韻

問徑隨春草支筇入午雲歸來陶靖節多病沈休文花
氣單衣稱松陰小簟分悠然天地別白日絕塵紛

嚴嵩

十六首

嵩字惟中分宜人弘治乙丑進士改庶吉士授
編修累官禮部尚書少師武英殿大學士有鈴

山堂集

張文邦云少師詩中典則其聲鬱律而
不忮其出恬澹而有餘足以經緯風雅

王子衡云介谿詩思冲邃間遠在孟襄陽伯仲之間唐虞佐云崆峒子評介谿詩曰淡石潭翁評介谿詩曰達達者其辭和淡者其辭平和之音其於古作者庶幾矣劉介夫云鈴山集詩宣志理情和聲昭則泐泐乎魏晉遺音崔子鍾云惟中詩清婉而綺不浮其質孫鷺沙云鈴山格致高古韻度深遠屬辭景中游情言外無近時膚脆之習而氣機員轉精采華妙往往自見於繩法之外楊用修云介谿吞容大篇寒瘦輕俗不入其胸次皇甫子循云少師詩達而和澹而平明潤而婉潔穆敬甫云嚴詩清奇固聲律家所不廢顧玄言云相君多秀句大率多類錢劉陳卧子云嚴相氣骨清峭應制諸篇頗爲雅贍特束濕寡自然之致爾

詩話弘治乙丑殿試泰陵焚香祝天願得良輔
不意是榜乃有分宜吁可怪也然分宜通籍即
見知於獻吉仲默旋請假還里讀書鈴山者七
年獻吉遠訪之山中作鈴山堂歌以贈於時子
衡華玉廷寶子鍾允寧應德輩交相引譽又走
使萬里索用修點定其詩可稱好事矣其與友
人贈答詩云自非肉食相藏拙安所宜又云故
園多所歡薄宦何為者贈相士顏生云本無蔡
澤輕肥念不向唐生更問年一似恬澹自持無
意榮利者迨爰立之後驕縱貪黷忿懷愾淫失
其本心終以致敗暮年自序詩集云晚登政塗
百責身萃回憶舊業如弁髦然觸口縱筆率爾
應酬不能求工亦不暇求工也對應德亦云少
於詩務鍛鍊組織求合古調今則率吾意而爲
之耳分宜能知暮年詩格之壞而不自知立身
之敗裂有萬倍於詩者生日詩猶云晚節冰霜

恒自保昧心之言將誰欺乎而應德翻謂不煩
繩削而合若湛元明一序讀之尤令人張目不
意講學者貢諛乃若是王元美樂府變云
孔雀雖有毒不能掩文章殆平情之論乎

贈友

北風吹層波高帆疾於馬
矯首望雲山日夕到鄉舍
親友慰遠歸春杯正堪把
故園多所歡薄宦何爲者

阻雨不得登蟠龍

溪上風雨來颭颭篁竹亂
油雲翳層峰對面隔霄漢
鳥道紆百盤龍門在天半
佳期恨緬邈寒望增淒斷
下馬

憩林居一顧屢長歎自無飛仙術安得凌絕觀

常甫憲副欽之翰檢與予先後登嶽欽之獨值雨

同賦

祠謁朝景暉峰登雲物變今朝山中客零雨罷

平聲登踐

林深厓路窄幽賞不可遍磴滑危難步谷暗近莫辨茲
山號靈幻頃刻殊隱見叨余上晴巒萬狀悉輸獻媿乏
摘毫賦琢句被厓鮮君侯擅風騷胸中富溪壑佳辭出
天巧不復勞洗鍊巖巖巖闕輝彩草樹迷蔥蒨豈被山靈

妒或遭造物譴竝觀欣茲竒獨往惜已殷期君嗣茲履
言保筋力健

金山

寺擁金山古江流碧海深千年此形勝詞客幾登臨波
浪浮香閣魚龍聽梵音晨風渡舟楫真有濟川心

西陵觀月

萬古秋天月西陵午夜看影流蒼柏罅光滿碧雲端節
序逢搖落山河對鬱鬱盤憑高瞻玉宇正憶鳳樓寒

冬閏和李宮諭

歲閏移陰律寒深值晚冬
市飈連九陌樓雪俯千墉
宮醞間能醉鄉書病嬾封
虛慙殿門籍寂寞卧高春

崔子謝病還懷寄

相送出郊寺獨歸愁郭門
春城涉遠道朝雨戀芳樽
幽夢時或到素心誰共論
若爲經濟略歸卧水雲村

過彭城

十月彭城水臨觀勢渺漫
客帆牽樹杪日夕畏風湍
汴

泗流爭長魚龍卧未安無人守茅屋寂寞傍江干

發宜春風雨枉諸公出餞別後懷寄

出郭衆峰暝蕭蕭風樹鳴嶺危攀磴上橋斷涉溪行四
壯勤王事三湘問楚程郡齋山霧裏回望渺層城

盧溪謁周元公祠

古鎮無監稅高賢有奉祠位卑名德重世遠士民思風
月盧溪迴衣冠宋代遺停驂肅瞻拜敢惜去程遲

石期驛逢李明府

清苦東安令心期得共論官看銅綬貴貧惜布袍溫野
樹依巒嶂春江對驛門天涯一攜手風雨送離樽

謁孝陵

社稷戎衣定梯航玉帛朝睹河功戴禹瞻廟祀宗堯石
馬嘶空翠金燈照寂寥遙看鍾阜上御氣滿層霄

同徐郡侯登浚渠亭

渠在郡城西唐刺史李將順
所鑿民賴其利目爲李渠久

湮徐浚之渠亭

其上傍有龍祠

徐侯亭子李侯渠水石前呈宿莽餘秋淨野田聞鸛語

雲深仙洞隱龍居，驅馳暫駐三湘節。
登賦初陪五馬車，此日佳遊習池共。
他年故事峴山如。

山塘

山塘深且廣，邈迤抱山麓。
隔浦見人家，依依桑柘綠。

出仰山

鐘聲在山間，客子出山去。
細雨濕春衣，新寒入高樹。

送顧使君華玉赴全州

吳客孤帆楚水涯，碧雲千里度長沙。
湘山獨夜看明月。

莫聽猿聲便憶家

明詩綜卷三十三

欽定四庫全書薈要卷二萬五百七

集部

明詩綜卷三十四

翰林院檢討朱彝尊編

李夢陽

八十首

夢陽字天賜更字獻吉慶陽人徙扶溝弘治癸丑進士授戶部主事轉員外郎應詔陳言彈壽寧侯張鶴齡繫錦衣獄旋釋之進郎中代尚書韓文草奏劾劉瑾坐姦黨致仕

一云降山西布政司經歷復逮

繫得

起江西提學副使恃氣陵鑠臺長訐奏罷

官寧庶人既誅坐爲庶人撰陽春書院記獄辭

連及尚書林俊力持之得免卒後弟子私謚文

毅天啟初追謚景文有空同子集

何仲默云詩必以盛唐爲

尚宋人似蒼老而實疎由元人似秀峻而實淺俗僕詩不免元習而空同諸作間入於宋辟之於樂絲竹之音要眇木革之音敎直若獨取殺直而并棄要眇之音何以感情飾聽也試觀江西以後之作辭艱者意反近意苦者辭反常讀之如搖鞞鐸耳崔子鍾云空同慨然興復古之思自唐以後無師焉顧華玉云獻吉詩卓爾不羣或失則摘矯枉之偏不得不然又云空

同言作詩必須學杜詩至於杜如至員不能加
規至方不能加矩矣此空同之過言也夫規矩
方員之至故匠者皆用之杜亦在規矩中耳何
得就以子美爲規矩邪 王子衡云獻吉游精

於秦漢割正於六朝以柔澹爲上乘以沉著爲
三昧以雄渾爲神樞以蘊藉爲堂奧會詮往古
之典用成一家之言巨者日融小者星列長者
江流闊者海受洋洋燿燿無所不極後有知言
之選歎賞不暇尚安能爲之揚抑哉 徐子容
云空同子詩衆體兼長渾厚沉著格高調古尤
工七言古歌辭開闔縱橫人不能述者獨摹寫
曲盡雄健可喜即錯置杜甫高適歌行中莫能
辨也 黃勉之云空同先生靈蛇早握天池獨
運黃鍾特奏白雪孤揚主張風雅深詣堂室樂
府古詩駸淫漢魏而覽眺諸篇逼類康樂近體
歌行少陵太白往指可凌後指難繼明興以來

一人而已

陳約之云弘治中文教大起學士

輩出力振古風

盡削凡調一變而爲杜則李何

爲之倡

楊用修云弘治間文明中天古學煥

日藝苑則李懷麓張滄洲爲赤幟而和者多失

於流易山林則陳白沙莊定山稱白者而識者

皆以爲旁門至李何二子一出變而學杜壯乎

偉矣又云空同以復古鳴弘德間觀其樂府幽

秀古豔有鏡歌童謠之風其古詩緣情綺靡有

徐庾顏謝之韻而人但稱其律詩子謂空同之

可傳者不在律空同之律少陵之餘瀝遺腴耳

任少海云獻吉詩如媧皇鍊石補天奔走百

靈雷電日月星辰悉躔爐冶徐子元云本朝

詩莫盛國初莫衰宣正至弘治中西涯倡之空

同大復繼之自是作者森起雖格調不同於今

爲烈又云空同崧高之秀上薄青冥龍門之派

一瀉千里穆敬甫云李詩雄奇高古律法嚴

整貫少陵之壘而拔其赤幟 邵弘齋云國初
詩是元如楊鐵厓解大紳成化間是宋如陳白
沙莊定山至弘德來駁駁乎盛唐矣如何大復
李空同 皇甫子循云薛君采詩俊逸真憐何
大復麤豪不解李空同夫大復未足於俊逸空
同不全於麤豪也 王允寧云空同有神交無
方之用有精純不雜之體縱橫奇正不一其裁
粹美同也珩琚瑛璫弗一其形溫柔同也至倒
插頓挫之法自少陵善用之後空同一人而已
學者未覩其大漫肆詆醜以空同掠古市美比
之剽掠嗟乎空同賦才神解能自作古假令與
李杜二豪竝生當代不爲李則爲杜矣 徐伯
臣云獻吉力持氣格濟以葩豔可謂雅道中興
惜其和平之氣未舒悲涼之情太勝 袁永之
云獻吉發憤慧業埽蕩陳言吐詞則振羽沉宮
宣藻則日光玉潔雖時徐生虎視於荆吳邊丞

蛟躍於齊魯何子揚瀾於河洛而君騰蹕蹂躪
總統包容所謂無可無不可者也周允大云
獻吉仲默一代絕倡邈焉寡儔莫子良云近
世譚藝之士獨稱空同大復二家至曰廣長數
千里上下數千年始得二人其見慕如此豈不
以二子詩遠追蹤於少陵視三百篇指義特近
哉何元朗云楊東里李西涯詩猶沿元人之
習至空同出遂極力振起之仲默廷實昌穀諸
人相與附和而古風遍域中矣王元美云李
獻吉如金翅摩天神龍戲海又如韓信用兵多
寡如意排蕩莫測又云獻吉才氣高雄風骨道
利天授既奇師法復古手闢草昧爲一代詞人
之冠要其所詣亦可略陳騷賦上擬屈宋下及
六朝根委有餘情思未及擬樂府自魏而後有
逼真者然不如自運滔滔莽莽選體建安以至
李杜無所不有第比謝監未是初日芙蓉僅作

顏光祿耳七言歌行縱橫如意開闔有法最爲
合作五律及五七言絕時詣妙境七言律雄渾
豪麗深於少陵抵掌捧心不能厭服衆志又云
成弘之際頗有俊民稍見一班號爲巨擘然轍
不及古中道便止搜不入深遇境隨就北地矯
之信陽嗣起昌穀上翼廷實下毗敦古昉自建
安換華止於三謝長歌取裁李杜近體繼軌開
元一埽叔季之風遂窺正始之塗天地再闢日
月爲朗詎不美哉又云國朝習杜數家華容孫
宜得杜內臨清謝榛得杜貌華州王維楨得杜
一支閩中鄭善夫得杜骨就其所得亦近似耳
惟夢陽具體而微又云涵洪并纖與亭毒竝吾
推獻吉然不能諱其滓 吳明卿云空同詩縱
橫跌宕搖五岳而凌滄洲 胡元瑞云李獻吉
手擘盛唐之派可謂達磨西來獨闢禪教又如
曹溪卓錫萬衆皈依 陸羽吉云成弘以降北

地信陽諸君子出執牛耳以凌厲詩壇宇內譚
藝之士率嚮往之然蒼素混質鯀音亂雅揣摹
搜攘勦襲其近似者以爲名往往炫色澤而乏
神理程之於古無當也黃清甫云昔陳思總東

京之闕謝客振江表之衰子昂變陳隋之靡今
李公夢陽湔宗元之陋斯文肇起實由於茲厥
功邈矣其詩專意上摹逝遵故轍斷自漢魏迄
於少陵少陵以下薄不經目故能近謝康曼遠
標道舉一篇一詠咸有所屬無論堂室直將竝
驅英雄之氣矯然千仞之上如時來屠沽奮跡
往英雄傷斗然一峰上不信萬山開中霄見海
日南斗豁天門斯竝純任骨力振絕鉛華故能
獨挽頽波屹爲文柱故嘗之才難與慮始王
百穀云明興以來作者絕少逮乎正統以後則
益猥弱雕瑣無足采觀李君崛起闕隴蛟騰虎
視力挽七朝之廢古必漢魏律必盛唐一時海

岳英靈之士翕然超之風雅之學亦遂復振吾
獨惜其調高而意直才大而情疎體正而意庸
力有餘而巧不足也何則矯枉太過和平不及
摹仿刻深陶鎔未暇此猶戰國嬴秦之後繼以
炎劉方其持寶錡斬白蛇除煩章削苛政其功
非不快也然問其詩書則陸生爾矣禮樂則叔
孫通爾矣此李君之詩撥亂反正之力多粉飾
太平之事少所謂可與創造難與守成者也
馮元成云空同雄渾悲壯深於少陵宇宙間異
色絕饒孫文融云空同格律雄渾真無可疵
其古詩更高絕近代罕兩馮開之云空同深
嗜而冥契者杜陵故得其神理而面目隨之
江進之云空同于鱗世謂其有復古之力然二
公固有復古之力亦有泥古之病彼謂文非秦
漢不讀詩非漢魏六朝盛唐不看故事凡出漢
以下者皆不宜引用噫何其所見之隘也夫詩

人所引之物皆在目前各因其時不相假借如
睢鴉螽斯桑扈蟋蟀樛木天桃采芣葛藟是三
百篇所用之物也降而爲離騷則用芷蕙荃蒨
木蘭菊英蛟龍鳳皇文虬赤螭曾有一物假借
於毛詩乎又降而爲唐人之詩則用江梅岸柳
澗草林花乳燕鳴鳩羣鴉獨鶴曾有一物假借
於離騷乎非不欲假目到意隨意到筆隨自不
暇舍見在者而他求耳至於引用故事則凡已
往之事與我意思互相發明者皆可引用不分今
古不論久近乃曰漢以上故事方用此特有見
於漢家故事字眼古雅遂爲此言其實繫用之
善不善非繫於古不古也 陳卧子云獻吉志
意高邁才氣沉雄有籠罩羣俊之懷其詩漢魏
以至開元各體見長然崢嶸清壯不掩本色其
原蓋出於秦風 曹潔躬云獻吉雖產於秦其
父正教授封丘遂徙家大梁故登科錄直書河

南扶溝人居於康王城葬於太陽山麓然則李
何皆中州人矣李王後起以中原二子自居王
稱李云人龍自起中原卧李稱王云高卧中原
堪有客又云足知上國羣公疏猶作中原二子
看蓋隱然自比於李何也孫豹人云先生五
言古詩本於陸謝句中皆有筋骨七古能以紀
事兼諷議誦之風颺烈烈五律意象俱妙七律
高亮間入於宋絕句信手拈來調絕今古俞
右吉云獻吉五言古詩康樂以後一人七言近
體少陵以後一人七言絕句太白以後一人惟
五言近體少遜前賢頗有才多之恨然如江從
樹裏斷山入雨中無隴樹迷關道吳山散驛樓
揚鞭指河洛立馬說周秦楚越窗中地江山戰
後容風雲餘霸氣吳楚混前朝塞口孤城斷峰
腰細澗分林疎山盡出風順櫓齊開幕雨津城
樹春帆水國樓江山百戰後登眺兩人初爽氣

圓殊
倫也

靜志居詩話成弘間詩道傍落雜而多端臺閣
諸公白草黃茅紛蕪靡蔓其可披沙而揀金者
李文正楊文襄也理學諸公擊壤打油筋斗樣
子其可識曲而聽真者陳白沙也北地一呼豪
傑四應信陽角之地功將之律以高廷禮詩品
浚州華泉東橋等為之羽翼夢澤西原等為之
接武正變則有少谷太初傍流則有子畏霞蔚
雲蒸忽焉丕變嗚呼盛哉獻吉五古源本陳王
謝客初不以杜為師所云杜體者乃其摹仿之
作中多生吞語偶附集中非得意詩也至效盧
駱張王諸體特游戲耳惟七古及近體專仿少
陵七絕則學供奉蓋多師以為師者其謂唐以
後書不必讀唐以後事不必使此英雄欺人之
言如江湖陸務觀司馬今年相宋朝秦相何緣

怨岳飛等句非
唐以後事手

河之水歌 二章 有序

河之水歌李子爲其子作也以子追不及

河之水流濺濺望父不見立河干

河水流流舟子搖櫓東方漸明我不得渡

招隱山辭 三章

山之桂青青秋風綠葉冬不零王孫幾時歸山空蕙草

摧

山之草萋萋春風花發桃源迷子規啼竹陰日暮愁人
心

秋之夕螢飛山風霜露霑人衣洞門翳寒蘿奈茲華髮
何

左袒行

陵曰不可平曰可安劉者誰勃與我寄不信祿不入軍

左袒計安出

朱近修云此仿
西涯樂府而作

車遥遥

車遥遥遥遥復邁邁望見秋塵起不見車輪轉知在秋塵裏

鴈門太守行

鴈門太守汝何人治邦三月稱明神我有牛羊賊不來
掠我有禾黍人不敢割昔我無衣今有袴著我思禮拜
太守太守不見憐但聞太守身姓邊紫髯廣額聳兩顙
太守出門四牡騤騤後擁阜蓋前導兩麾行者盡辟易
居者不敢窺旁問太守何所之云訪城南皇甫規

楊用修云

神似古樂府魏晉
以下絕無僅有

內教場歌

雕弓豹韃騎白馬大明門前馬不下徑入內伐鼓大同
邪宣府邪將軍者許邪一解武臣不習武奈彼邊陲西內
樹旗皇介夜馳鳴礮烈火嗟嗟辛苦一解

轅駒歌

世徑互險夷富貴安所需昔爲櫪中駿今爲轅下駒白
日仰悲鳴青雲立踟躕未蒙主人顧何繇效馳驅朝思

碣石津夕睇流沙隅常恐侶凡蹇棄捐中路衢

雜詩 二首

西國有佳人獨立青雲端容豔若桃李左右佩芳蘭含
思理玉琴泠泠一何閒更節有餘悲曲終再三歎借問
歎者誰中意難自宣沉吟攬衣帶仰視鳴鶴翻思阻望
不申何況隔丘山

枕櫬蝕以傾梁棟誠獨難流言播四國周公疑患涼
颼激頽景奄忽不可攀衆羽日繽紛朱鳥戢其翰殺身

苟無益去去從所安傷哉式微詩千載起余歎

發京師 二首

驅車彰義門遙望郭西樹冠蓋耀青雲車馬夾廣路威
風何赫奕各蒙五侯顧回飈動地起白日倏已暮棄擲
委蔓草榮華若朝露亮無金石交人生豈常故締綌足
禦冬誰念紉與素愜彼白華篇氣結不能慙

鴛蘿附松柏枝葉固相因行子戀儔匹况遇同鄉親北
風起河梁日暮多飛塵攜手同車歸駕言西適秦道遠

長渴饑客子懷苦辛仰瞻天漢流夜永不得晨
驂馬婦其曹鳴鴈各求羣明星出東方照見車
下人夙興即往道登彼高路津還顧望京邑愴
焉何所陳

衛上別王子

晨風應候至雞鳴各嚴車我今游宋中子當旋
舊閭僕夫理前綏轅馬悲鳴趨一別阻秦周相
望萬里餘首春霜露重厚汝征衣襦昔爲同袍
士今在天一隅故者日以遠疇能察區區

贈徐禎卿

獨處忽不懌攬衣循東廂樹木何修修春風起飄揚我
友駕在門告言適江湘倉皇挈玉壺追送臨河陽顧瞻
兩飛鳬竝戲水中央翩翩厲羽翮鳴聲一何長奈何游
客子一別永相望時澤亮有周天命固其常薄終義所
劣別離庸詎傷懿彼回路贈慷慨申此章

贈劉氏

矯矯雲中鵠忽忽晨南翔連翩客游子駕言逝何方霜

露日夜零東路悠且長意欲從子逝我馬玄以黃徒思
諒無益欲置難遽忘愛子千金軀雙親在高堂

時命篇

代馬不戀越荆禽豈巢燕鸛鵠渡汶水君子憂未然奈
何客游子率爾辭故山行獸顧丘林出雲有歸還交交
聲利塗軒車日駢闐誰念牛下人悲歌夜中歎豪門有
棄襦我衣恒不完張儀懼諸侯泄柳乃閉關貧賤豈盡
愚時命當自安

述憤 二首

小草生枯桑芊芊競芳辰雖云殊本根寄託各有因自
我罹幽囚忽焉經浹旬我兄千里餘渺渺長河津妻子
日望予蒼蒼隔西鄰所幸二三友笑言越昏晨宵鐙促
燕膝昵語忘苦辛患難苟相得毋論骨肉親

明月出東方徒行反家室室人走相訊問我何由出明
知非夢寐欲辯仍自失喜極雙涕零轉面各銜恤垂鐙
照絙卷浮埃滿朱瑟愁言卒未傾忽復見晨日

雜詩

宛宛春田鳩飛鳴柔且閒一朝化為鷹肅肅厲羽翰衆禽不敢竝孤立秋雲端鳥既不自知人胡究其然

予懷百門山水尚矣頗有移家之志交春氣熙忻焉獨往述情遣抱示同好數子

浮海傷固窮逾河歎誠邁濯纓萬里流高視九州外功成奔運徂氣至流飈代淒淒秋柯零冉冉春條媚周覽倦河壖孤悰冀巖瀨道以沉寂超賞與崇深會豈惟肆

遠情亦因謝塵籟聿想山中人風吹女蘿帶折麻凌險
岵采秀越森蒼眷彌志終申獨往竟誰礙亭亭太行峰
崑崙百門對抗手別故懽乘雲弄煙溼

自大過渡河趨陂沙岡

凌春遠行邁游目恣沿越漸辨林中曙遽失霞上月觸
物誰爲情悲歎曷可歇載登隋疆場况眺宋城闕陽坡
散初柳陰曲峙寒雪只此判氣候豈必殊燕粵潛潛濁
河駛寥寥晨風發揚帆截驚瀨倚權望窮髮鳬鴈眇難

即汀蘭翠堪纈美人既莫期天路復幽絕陂岡鬱參錯
岸沙皓明滅日暮孤雲興何以慰忡悒

陽武詠懷陳平張蒼遂及博浪之事

玉璽戒不力金鏡淪無光大人既龍興烈夫亦鷹揚伊
人各乘時矯若孤雲翔韓椎豈在屢秦氣日以喪六奇
佐揮戈五運開靈昌時來屠沽奮跡往英雄傷平生冀
風期况乃逾故疆灑淚越修垆含淒漶河梁古墳密礁
嶢春沙鬱茫茫徒瞻松柏路詎甲椒蕙芳遺榮竟何尤

任智終自戕羨彼赤松遊援筆即此章

覽遊百泉乃遂登麓眺望

束髮懷幽竒覽籍冀有遇來登百門泉果協佳勝趣
忘員波踊藹藹浮陽聚止坎渟泓洌激石迅湍注昔聞
滄浪濯今解川上喻豈惟傷衛歌兼以發蒙慮况值春
序中羣物已改故菰蒲冒清深鱗介各有慕行羨浴渚
鳥靜對棲雲鷺巖扉空潭影林藹變朝暮極目北上帆
朝宗感游寓

德安趨潯陽

始征晨風息雲流日色展登陸艱且澀厲澗一何緬維
時仲秋交颼颼林飈卷綠竹垂我車丹花映行幃冒巖
維有松繡石盡成蘚攀蹇雖多悅亘頓乃勞倦日中迫
廬岳蹊徑愈回蹇雲湧連遙嶠雨暗失近巘奔崩萬壑
會嶮絕一徑轉遽訝川梁沒幸遇石瀨淺道以習坎利
用待旣濟顯介石諒益固巨川豈遂眩誰哉能豫謀隨
寓斯可遣

白鹿洞徧覽名跡

情高忽凌厲步健輕嶢緬葛弱亦須捫厓滑每獨踐涉
清愛重屢探阻遺驚眩始茲陟五峰遂憩松下獻巖桂
紛始華石耳翠可卷追想白鹿跡伊人竟何遣觸端緒
自縈薜荔况在眼慨歎意莫置顧望日已晚夕湖浴岑
峭流光滅蘭坂命酒寫幽獨鳴琴且游衍

始至白鹿洞

曠哉超世志緬邈平生思鬱壹眷名跡久注匡山陲南

涉枉嘉命果諧夙所期
仲秋巖壑清宮館復在茲
白石激寒湍巖蘿裊空基
黯傷逝者往密慚來者追
性同道豈隔塗異理空悲興
言懷昔賢日竟眺前岐
榛荒徒鬱紆林崦一何采
感情匪哀歎聊詠昭言垂

赴懷王山作

始臨清溪寺不謂茲路艱
崎嶇踰南嶺轉見山鬱盤重
陰起北谷凍雨響前巒
志定邁孰禦勇往竟孤攀
挽葛接懸猗架木凌飛湍
律律巖壑變颯颯嵐風寒
隔港望

絕岫亭亭已雲端

廣獄成還南昌候了

夕棲瑞洪渚遙覽渚北山相傳洪厓子乘雲自此間履
跡今尚存其人邈莫攀粵子登征塗頻年涉間關毀譽
一嬰心寤言多所歎於茲誠跼蹐振衣躡前巒泝水莽
浩浩驚風蕩回川欲濟惜無梁飈輪儻中還

湘妃怨

采蘭湘北沚寒木澧南潯淥水含瑤彩微風託玉音雲

起蒼梧夕日落洞庭陰不知篴竹苦惟見淚斑深

宗子相云

顏謝逸響

宋

韓文云深秀

自從行

自從天傾西北頭天下之水皆東流若言世事無顛倒
竊鉤者誅竊國侯君不見姦雄惡少椎肥牛董生著書
翻見收鴻鵠不如黃雀啁盜跖之徒笑孔丘我今何言
君且休

西來行

冬廿六日十二月西來泛湖雨明滅雨寒著樹盡成雪
天波霽憲路幽絕鵲鵲禿鶯立如人銜魚避船偷眼嗔
雪晴獵夫會尋汝乘時早可收其身

土兵行

豫章城樓饑啄烏黃狐跳踉追赤狐北風北來江怒湧
土兵攫人人叫呼城外之民徙城內塵埃不見章江塗
花裙蠻奴逐婦女白奪釵鐲換酒沽父老向前語蠻奴
慎勿橫行王法誅華林桃源諸賊徒金帛子女山不如

汝能破之惟汝欲犒賞有酒牛羊豬大者陞官佩綬趨
蠻奴怒言萬里入爾都爾生我生屠我屠勁弓毒矢莫
敢何意氣似欲無彭湖彭湖翩翩飄白旗輕舸蔽水陸
走車黃雲卷地春草死烈火誰分瓦與珠寒厓日月豈
盡照大邦鬼魅難久居天下有道四尺守此輩可使亦
可虞何況土官妻妾俱美酒大肉吹笙竽

楊用修云只
以謠諺近語

入詩史而高古不可及 孫豹人云贛州賊作亂都御
史陳金奏調廣西狼兵征之土兵行所由作也此詩當
與杜陵北
征詩竝傳

上元訪杜鍊師

宣皇昔時乘八風御龍遊戲行煙空馬前兩兩侍玉女
別館多在蓬萊宮朝天宮中舊時殿樓臺畫鎖無人見
琉璃井塌青苔滿松柏森森月如練嗚呼往事難具陳
燈火如山又一春北斗壇西訪隱淪我師黃衫白氎巾
坐我更致西樓賓玉杯潑灑赤瑪瑙織罽四角銀麒麟
酒肉山堆滿堂醉仙厨往往來八珍孝宗之朝五真人
師也磊落當其倫自言召見親賜食曾把丹書獻紫宸

如今寂寞看春色銀魚玉帶無消息
豈惟魚帶無消息
欲語吞聲淚霑臆勸師對此莫酸辛
世間萬事如轉輪
且將芝草供生計聊與煙霞作主人
月偏彩雲當牖生
旋呼兩童吹玉笙聞師妙得逡巡術
百壺倒盡還須傾
古來仙子向誰在飲者翻垂千載名
名垂千載亦區區
酒闌燈昏夜復徂不見泰陵草已宿
春生樹啼雙老鳥
此時亦應羣帝趨金燈翠旗光有無

奉送大司馬劉公歸東山草堂歌

東山有草堂縹緲雲嶠孤前對祝融峰下瞰巴陵湖明
公昔時此堂居麋鹿豕當窗趨洞庭日落風浪湧倒
影射堂堂欲動慘澹誰聞紫芝曲獨善不救蒼生哭先
帝親裁五色詔老臣曾受三朝祿此時邊檄多戰聲曳
履謁帝登承明謝安笑却淮淝敵魏相坐測單于兵九
重移榻數召見夾城日高未下殿英謀密語人不知左
右微聞至尊羨自從龍去不可攀公亦卧病思東山湘
娥含笑倚竹立山鬼窈窕堂之側上書苦死只欲歸聖

肯優容意悽惻內府盤螭縷金織賜出傾朝皆動色白
金之鈇紅票記寶鈔生硬雅翎黑崇文城門水雲白是
日觀者塗路塞城中冠蓋盡追送塵埃不見長安陌人
生富貴豈有極男兒要在能死國不爾抽身早亦得君
不見漢二疏千載想慕傳畫圖即如草堂何處無祿食
覲竊胡為乎乃知我公真丈夫嗚呼乃知我公真丈夫
二月四日部署宴餞徐顧二子

春日載陽官署幽東吳二子過我游庭空日斜吏人散

宵然何異經林丘今晨驚蟄暖氣達昨夜哀鴻呼故儔
中庭古槐蒼蘚溽上有百鳥何啁啾倉庚交交刷其羽
君看巨細各有求明時冠軒幾邂逅得暇胡不攀淹留
自從去年識徐顧令我意氣傾南州徐郎近買洞庭柁
顧子亦具錢唐舟浮生飄轉若飛藿倏忽聚散誰能謀
風光爛漫况復爾願寫清壺消客憂故人苦稱不好飲
舉杯入脣還復休妙歌時時激慷慨鄙夫何以荅綢繆
嚴柝沉沉靜夜色北斗倒挂城南樓祇恐天明驅馬出

攬袪延望河之洲

苦熱諫屠參議

豫章之熱真毒淫六月已破仍不禁赤雲行空日在地
萬里一望炎煙深東蒸扶桑榦欲槁黑河水乾龍不吟
院松亭亭我所愛比遭摧炙無好陰縱令跣足欲何往
此地寸冰如寸金層檐大廈尚喘喙矮屋茅堂淚滿襟
滕王有閣高百尋閣下澄江清映心紫微使者卧其上
卷幔恰對西山岑赤脚門子搖大扇行坐吟哦揮素琴

幾欲往訪簿書積豈我無酒同誰斟亭午蘊隆潭水沸
蛟蜃下徙鼃鼃沉何況走原之獸棲枝禽嗚呼豫章之
熱其苦有如此而我胡為營營與世爭華簪

徐子將適湖湘余實戀戀難別走筆長句述一代
文人之盛兼寓祝望焉爾

崢嶸百年會浩蕩觀人文建安與黃初叱咤皆風雲大
歷熙寧各有人戛金鼓玉何繽紛高皇揮戈造日月草
昧之際崇儒紳英雄杖策集軍門金華數子真絕倫宣

德文體多渾淪偉哉東里廊廟珍我師崛起楊與李力
挽一髮回千鈞天球銀甕世希絕鰲掣鯨翻難具陳洪
川無梁不可越日暮悵望勞余神徐郎生長蘇臺陰二
十作賦雄海濱竭來抱玉叩閭闔長安繡陌行麒麟是
時少年誰最文太常邊丞何舍人舍人飄飄使南極直
窮金馬探瀘津爾雖不即見顏色夢中彷彿形貌真余
也潦倒簿書客諸公磊落清妙身大賢衣蓋豈虛擲應
須爾輩揚其塵休令黼黻怨岑寂要與琬琰增嶙峋海

陵先生雅愛士晚得徐郎道氣伸
喬王款接雖不數邇聞亦欲來卜
鄰驂騑造父兩相值一瞬萬里誰
能馴都門二月芳草發御溝楊柳
垂條新徐郎綰牒將遠適使我旦
夕生悲辛爲君沽酒上高樓月前
醉舞梨花春天明挂帆向何處鴻
鴈哀鳴求故羣南登會稽探禹穴
西浮湘水弔靈均洞庭波寒木葉
下峽口風急猿嘯聞司馬太史有
遺躅歸來著書追獲麟

朝飲馬送陳子出塞

朝飲馬夕飲馬水鹹草枯馬不食行人痛哭長城下城
邊白骨借問誰云是今年築城者但道辭家別六親寧
知九死無還身不惜身為城下土所恨功成賞別人去
年賊掠開城縣黑山血迸鴉翎箭萬里黃塵哭震天城
門晝閉無人戰今年下令修築邊丁夫半死長城前城
南城北秋草白愁雲日暮聞鳴鞭

林良畫兩角鷹歌

百餘年來盡禽鳥後有呂紀前邊昭二子工似不工意

吮筆決眚分毫毛林良寫鳥祇用墨開綠半埽風雲黑
水禽陸禽各臻妙挂出滿堂皆動色空山古林江怒濤
兩鷹突出霜厓高整骨刷羽意勢動四壁六月生秋疇
一鷹下視睛不轉已知兩眼無秋毫一鷹掉頸復欲下
漸覺颼颼開風毛匹綃雖慘澹殺氣不可滅戴角森森
爪拳鐵迴如愁胡眚欲裂朔雲吹沙秋草黃安得臂爾
騎駟鐵草間妖鳥盡擊死萬里晴空灑毛血我聞宋徽
宗亦善貌此鷹後來失天子餓死五國城乃知圖寫小

人藝工意工似皆虛名校獵馳騁亦末事外作禽荒古
有經今皇恭默罷游燕講經日御文華殿南海西湖馳
道荒獵師虞長俱貧賤呂紀白首金爐邊日暮還家無
酒錢從來上智不貴物淫巧豈敢陳王前良乎良乎寧
使爾畫不直錢無令後世好畫兼好畋

錢選畫張果圖歌

張翁紙驢真有無錢也何意傳其圖印記雖明幅斷裂
李侯完之亦奇絕所恨圖尾錢有詩就蛇添足將無癡

憶昔翁來集賢院入宮詔許肩輿便一日聲名人主動
千年面目吾今見帝貌深沉玉榻雄侍人一異三人同
漢皇信有瑤池降秦始枉慕蓬萊通玄言未竟鈴殿風
寸驢躍出青箱空有童追捉雙眼紅此驢蹶躒盤當中
李侯一看一絕倒每稱獨苦嗟良工細觀張翁骨格古
徐福五利寧其伍曰嬪真令天下疑遙歸轉覺皇心蠱
長生殿前牛女辰廣寒仙桂舞鸞身世間但識申師巧
誰解中條放浪人

洛陽道

桃花馬金絡頭白面郎紫貂裘三月洛陽道垂柳蔭清
溝溝水東流不記春花開花落幾回新東風日暮楊花
起愁殺高樓獨倚人

朱遷鎮

水店回岡抱春湍滾白沙戰場猶傍柳遺廟只棲鴉萬
古關河淚孤村日暮笳向來戎馬志辛苦爲中華

徐墓書張相國碑銘

不讀南州傳誰知高士心
江城遺像在春日古祠深竹
鳥嚶嚶合松牆靡靡陰曲江
千載碣書罷淚盈襟

明遠樓春望

貢院初開閣春陰獨倚欄
柳邊千艦聚花裏萬家殘風
雨江聲壯兵戈地色寒斷腸
沙塞鴈羣起向長安

蔣仲舒云

含愁無限

酬京師友人見寄作

浮雲悲故國積水起鳴雷
不見長安日愁登古吹臺故

人三月別天上一書來欲問經行處山中杜若開

東陂秋汎

久說東陂好今陪上客遊綺筵開畫舫哀笛奮中流舞
每低輕燕歌先起白鷗稍前休更進吾愛荻花洲

游兵

聞道新開口游兵未解圍只須殊死戰莫放隻輪歸漢
月已自滿林鳥常夜飛早將書插羽天子日宵衣

環縣道中

西人習鞍馬而我憚孤征
水抱琵琶寨山銜木鉢城
裏瘡新罷戰插羽又徵兵
不到窮邊處那知遠戍情

赴郊觀宿

城邊水色靜春茅苑外鶯啼拂露梢
萬戶煙花臨複道九天宮殿鎖南郊
霓旌夜發清溪繞彩仗晨飛碧樹交
身到鈞天渾不解坐聞仙樂下雲旂

謁陵

本朝陵墓傍居庸聞說先皇駐六龍
一日玉輿回朔漠

遂令金殿鎖秋峰
明裡袞職雖多預
備物祠官豈盡供
報祀獨知今上切
每於霜露見愁容

秋懷 三首

慶陽亦是先王地
城對東山不啻墳
白豹寨頭惟皎月
野狐川北盡黃雲
天清障塞收禾黍
日落溪山散馬羣
回首可憐輦鼓急
幾時重起郭將軍

宣宗玉殿空山裏
野寺霜黃鎖碧梧
不見虎賁移大內
尚聞龍舸戲西湖
芙蓉斷絕秋江冷
環珮淒涼夜月孤

辛苦調羹三相國十年垂拱一愁無

大同宣府羽書同莫道居庸設險功
安得昔時白馬將橫行早破黑山戎
書生誤國空談裏祿食驚心旅病中
女直外連憂不細急將兵馬備遼東

流

穆敬甫云諸作如
雲屯高嶺風涌飛

雪後朝天宮

馬上城中見雪山白雲蒼霧滿燕關
蓬萊咫尺無人到松柏黃昏有鶴還
當日翠華游物外百年金殿鎖人間

浮塵擾擾江湖遠
悵望巖棲不可攀

艮嶽篇

宋家行殿此山頭
千載來人水一丘
到眼黃蒿元玉砌
傷心錦纜有漁舟
金縉社稷和戎日
花石君臣棄國秋
漫倚南雲望南土
古今龍戰是中州

潼關

咸東天險設重關
閃日旌旗虎豹閒
隘地黃河吞渭水
炎天白雪壓秦山
舊京想像千官入
餘恨逡巡六國還

滿眼非無棄繻者寄言軍吏莫嗔顏

別徐子禎卿得江字

我愛南州徐孺子明瑤美璧世無雙
新從北極看南極便自吳江下楚江
日落鷓鴣啼廟口水清斑竹映船窗
襴衡玉絮俱黃土千載何人復此邦

臺寺夏日

古臺高竝鬱岩堯斷堦稜層鎖寂寥
積雪洞門常慘慘炎天松柏轉蕭蕭
雲雷盡辟丹青壯神鬼虛堂世代遙

惆悵宋宮偏泯滅二靈哀怨不堪招

漢江歌送范子之桂陽

漢江江上鷓鴣鳴漢江游客無限情青山落日下帆影
芳草月明聞櫂聲黃鶴磯頭暮雲盡鸚鵡洲邊春水生
莫倚仲宣能作賦洞庭南接桂陽城

秋望

黃河水遶漢宮牆河上秋風鴈幾行客子過壕追野馬
將軍韜箭射天狼黃塵古渡迷飛輓白月橫空冷戰場

聞道朔方多勇略只今誰是郭汾陽

王元美云
雄渾流麗

朱遷鎮

水廟飛沙白日陰古墩殘樹濁河深
金牌痛哭班師地鐵馬驅馳報主心
入夜松杉雙鷺宿有時風雨一龍吟
經行墨客還詞賦南北淒涼自古今

東華門偶述

銀甕爛生光盤龍繡袂香但知從內出不省試何王

贈何舍人

朝逢康王城暮送大堤口相對無一言含悽各分手

豔曲

父母愛小女女是聰明子生不識鴛鴦繡出鴛鴦是

曉鶯

曉曉夢中迷流鶯碧樹西起來紅日照已度別枝啼

雲中曲 二首

黑帽健兒黃貉裘匹馬追奔紫塞頭相逢不肯通名姓
但稱家住古雲州

白登山寒低朔雲野馬黃羊各一群冒頓曾圍漢天子
胡兒惟說李將軍

聖節聞駕出塞

千官北首望龍旗萬國車書集鳳闈八駿瑤池秋色遠
幾時親擁白狼歸

送周判官

明鐙綠酒五花裘客舍新秋螢火流問君不飲真何事
明日出城風葉愁

月夜過訪王子

率爾高陽飲博徒酣歌擊劍膽何麤金門貴客如相許

徑脫鸛裘付酒壚

蔣仲舒
云語爽

夏口夜泊別友人

黃鶴樓前日欲低漢陽城樹亂烏啼孤舟夜泊東游客
恨殺長江不向西

別李生

華也南來送我行青絲挈酒玉壺輕滕王閣下江千尺

一曲滄浪萬古情

送王韜

王郎口談金虎文自稱師是紫陽君挂帆明日忽南去
影落龍江五色雲

經行塞上

天設居庸百二關祁連更隔萬重山不知誰放呼延入
昨日楊河大戰還

歸塗詠古

河濟誰言不共流
青春惡浪古懷州
蕩搖少室三花樹
倒映天壇白石樓

汴中元夕

中山孺子倚新妝
鄭女燕姬各擅場
齊唱憲王新樂府
金梁橋外月如霜

京師春日漫興

十日不出花盡開
城南城北看花來
即教閉戶從花盡

莫遣看花不醉迴


蔣仲舒云語
老而用意婉

送人之南郡

鼓刀朱亥本微寒，白首侯嬴是抱關。
不為千金增意氣，祇緣一諾重丘山。



明詩綜卷三十四



總校官庶吉士臣張能照

校對官檢討臣龔大萬

謄錄監生臣左顯若

欽定四庫全書薈要

集部

明詩綜卷三十六

五

詳校官編修臣王天祿



欽定四庫全書薈要卷二萬五百八

集部

明詩綜卷三十五

翰林院檢討朱彝尊編

何景明

七十八首

景明字仲默信陽人弘治壬戌進士授中書舍人轉吏部員外出爲陝西提學副使有大復山

人集

顧華玉云仲默咳吐珠璣人倫之俊

康

德涵云漢魏以降訖於開寶世代旣移音節斯異修辭之士能無惡厥趨斯已優矣復能引而上之不沉流俗若仲默者豈非鮮哉

王

子衡云仲默侵風匹雅欲騷儷選遐追漢魏俛
視六朝溫醇典雅丰容色澤靡不備舉規治古
調無所不極 崔子鍾云空同方雅簡默稍飾
廉稜仲默恬淡溫孫不露才美李之雄厚何之
逸健宜學者尊為宗匠 孟望之云是時關中
李獻吉濟南邊廷實以詩文雄視都邑何君往
造語合乃力變之古自是操觚之士往往趨風
漢魏矣 徐子容云仲默昌穀咸懷雋才與獻
吉相頡頏而二子秀潤清藻微乏雄渾 楊用
修云仲默枕藉杜詩不觀餘家其於六朝初唐
未數數然也與予及薛君采言及六朝初唐始
恍然自失然終不若其效杜諸作也 黃勉之
云大復詩所謂使集者宣敬皇帝哀詔時作也
家集者劉瑾柄國謝病還鄉時作也京集者直
內閣制勅時作也 喬景叔云國初詩尚襲元
習宣正以來駸駸如宋矣先生與諸君子一變

而爲漢魏盛唐起千載之衰屹然一代山斗
樊少南云國朝詩文至弘治間極矣先生首與
北地李子一變之古詩擬曹劉賦賞屈宋天下
翕然從風盛矣哉千載一時也唐虞佐云仲
默詩探冥扶奇增華激潤軋晉魏而上之一唱
三歎有餘音焉任少海云仲默詩如黃鐘在
縣金石發作伶坊供奉之官莫不按宮商謹節
奏其橫放處如項羽提三尺劍出江東不必斬
將搴旗而登壇嘯叱千人皆廢徐子元云大
復上追漢魏下薄初唐大匠揮斤羣工斂手
蔡子木云明興百六十年詩文迄無定體自先
生崛起汝南與獻吉發憤詞林超覽古始乃排
斥羣疑歸之大雅何其雄也穆敬甫云何詩
清淑典麗鏗然瑩然真得風人溫柔敦厚之旨
李伯華云大復詩宗李杜文仿班馬字兼顏
柳或與邊華泉李空同稱爲海內三才或與崔

後渠稱為中州二俊或與關中諸公并吳下徐
迪功稱為弘德七子王元美云仲默如朝霞

點水芙蓉試風又如西施毛嫱無論才藝却扇

一顧粉黛無色又云仲默才秀於李氏而不能

如其大又云義取師心功期舍筏以故有弱調

而無累句詩體翩翩俱在鴈行又云李源風何

源雅風故長變以明志耳觀其深沉莽宕激昂

鼓壯暗鳴懽懽忽正而奇正若嶽崎奇若海颶

則李子哉是故少孫其緣情即象觸物比類靡

所不遂壁坐璣馳文霞淪漪緒颺搖曳春花徐

發驟而如淺復而彌深疑無踰何子而上者夫

百鳥集於詞林而二子雄飛或羊角而橫舉或

順颶而肆翔其九萬里同也又云鳴鸞佩瓊萬

象咳唾吾推仲默然不能諱其孱汪伯玉云

何李兩家遞為桓文鼓旗鼓號天下獻吉非規

矩弗由先生則務底於化於時主典則者張獻

古主神解者附先生要諸至言各有所當顧其相直若繩墨而相濟若和羹即言逆耳而心莫

逆耳視者勿察也

黃清甫云大復詩因意著

詞就詞成篇故情性冲逸興象閒雅曩與李公

共驪詞場竝宗雅道李則氣勢為勝公則風度

為優

彭子殷云仲默朗音亮節惜年弗遐美

而未至今也拔痛豪之獻吉歷於其上天下其

誰信之

屠緯真云空同雖極力摹古天才故

高不沒雄渾之氣大復雖不盡摹古法度故在

都無纖豔

之習此其所以竝傳也 顧玄言云

李何二學憲氣象弘闊詞采精確力挽頽風復

增古雅選材兩漢嗣響三唐如航琛越海輦賁

踰嶠琳闕珠房輝燦朗映各成一家繼而海內

翕然景從為明音中興之盛實二公倡之也二

公古體竝出楚騷詞漢樂府而憲章少陵者近

體猶酷擬杜李古勝何如屯雲出峽驚風涌湍

波瀾變幻層彩疊出何近勝李如石門寒瀑劒閣朝霞空中聲色高遠難攀薛君采云俊逸終憐何大復廬豪不解李空同則何似勝李邕胡元瑞云古今才人蚤慧者多寡大成大成者不必蚤慧兼斯二者獨魏陳思次則唐王子安明則何仲默二子風華神秀絕自相當然子安尚沿六代綺靡仲默一掃千秋茅塞其識與功不可同日語也又云今人因獻吉祖襲杜意輒假仲默舍筏之說動以雞口牛後爲辭此未覩何集者就仲默言古詩全法漢魏歌行短篇法杜長篇法王楊四子五七言律法杜之宏麗而兼王岑高李之神秀卒自成一家冠冕當代所謂門戶堂奧不過如此古人影子之說以獻吉多用杜成句故有此規自是藥石非欲其盡棄根源別安面目也又云李以骨力勝何以神韻超學何不至不失雕龍學李不成終類畫虎

江進之云何大復詩何嘗規規摹古然已逼古人
陳卧子云仲默姿制羸秀神氣和朗發微
音吐芳訊令人有形穢之恥昔人稱王恭濯濯
似春月柳又評褚書爲瑤臺婢娟庶幾近之詩
云有美一人清揚婉孌迨將彷彿焉矣曹潔
躬云唐之士人稱輞川爲詩天子浣花爲詩宰
相王諸體精緻毫髮無憾若是乎盡善盡美也
杜硬語盤空額唐潦倒若似乎未盡善也而王
聲價反讓杜數等問之解人會於心不能言其
故也弘正間李何竝起始而相應既而相規李
扛鼎拔山千夫盡廢何霜葭玉樹照曜一時右
何者美其醇而寡疵少李者指其生吞活剥不
知李正藉短以擣長而何即長反見短明鏡無
塵不若月中有物雖稱勍敵然終遜李一籌
姚仙期云誦大復詩如聽雲中奏曲但覺洋洋
盈耳孫豹人云大復五言句句琢字鍊長歌滔

滔洪遠又復清爽絕倫五律全法右丞清和雅
正七律自少陵以外無所不擬絕句獨不摹盛
唐秀峻莫比要之驟而如淺復而彌深兩言其
定評矣沈山子云大復楚謠漢風魏製晉造
靡所
不有

靜志居詩話弘正間作者倡復古學同調六七
人李何實爲之長李以秀朗推何何以偉麗目
李其後互相牴牾何謂李拙韞振鐸李謂何搏
沙弄泥譬之鍼砭不中腠穴徒嘵嘵耳兩君皆
負才傲物何稍和易以是人多附之薛君采詩
云俊逸終憐何大復麤豪不解李空同自此詩
出而抑李申何
者日漸多矣

短歌行

冉冉秋序肅肅霜露蓄我旨酒
召我親故鳥歡同林水
歡同源矧我同鄉胡能弗敦
耀靈西藏明燈在室更長
夜良可以繼日園有藝菊庭
有樹蘭秋芳是悅春榮曷
觀高陵可升海水可測出門
異路安知南北生年幾何
去者日多子不我樂聽我短歌

陳卧子云弱於
曹公壯於子桓

塘上行

蒲生寒塘流日與浮萍儔
風波搖其根飄轉似客遊客
遊在萬里日夕望故州
鵲鳴歲暮蟪蛄知凜秋暑退

厭絺綌寒至思重裘佳人不與處圓魄忽四周房櫳淒
鳴玉紈素誰爲收白雲如車蓋冉冉東北浮安得雲中
鴈尺帛寄離愁

陳卧子云婉麗清
發不在建安下

梁甫吟

君不見泰山高高梁甫在其半古來封壇禪地無宮館
厓崩壁坼鐵鎖斷秦碑漢碣何人看自從生人開九州
九十六帝行權謀虎豹啖食龍蛇憂朝翻暮覆作雲雨
立談坐笑生戈矛君不見田疆論功爭二桃齊門三丘

獐野蒿又不見魯連辭賞輕千金却秦救趙何雄豪眼
前無人辨曲直身後聲名更何益拂袖空憐蹈海心護
車枉負排山力梁生五噫歌莫哀東絕梁甫觀蓬萊千
年雲開錦繡壁五色日抱金銀臺瀛洲方丈列仙占文
成五利何能驗徐生入島竟不回博士儒生盡坑塹我
吟梁甫君振衣世路崎嶇多是非琅玕芝草海岱曲釣
竿拄杖從今歸

沈道初云豪放
不在太白下

采蓮曲

急歌太短緩歌長清風夕回素雲翔雙鳬飛起向橫塘
荷花不言空斷腸明月婉轉流西方月中白露沾衣裳
紅顏青鬢安能常萬歲爲樂莫相忘

獨漉篇

獨漉獨漉驅車折軸不畏折軸但畏車覆
凡者猶生彼中衢雖有蘭蕙當門則鉏同行竊金相顧道左我實
不知彼則畏我食荼知苦食梅知酸狐裘之敝可以禦
寒有虎斑斑伏于林下我欲射虎媿無勁弩肅彼北風

渡彼中流豈不懷歸與子同舟

宗子相云絕
似古逸詩

白紵歌

手中色絲舊所治青紅碧綠當自知衆中不語心向誰
感君厚恩私念之東流之水不西馳泰山在前不可移
紅顏白首奚足辭

行路難 二首

牀有織綺篋有織素請君視綺還視素憐新不如莫棄
故樽中有酒盤有餐聽我爲歌行路難衆中歡樂多志

氣豈知他人不得意白日有時不照地安得保君常不

棄

陳卧子云結句無嫌質直樂府本色也

天河熒熒西北轉織女牽牛不相見由來天上亦別離
何怪人間有悲怨世情磷薄惡衰賤駕車騎馬有人羨
少年不得君愛惜紅顏勝人亦何益

吳明卿
云悽惋

俠客行

朝入主人門暮入主人門思殺主仇謝主恩主人張燈
夜開晏千金爲壽百金錢秋堂露下月出高起視廐中

有駿馬匣中有寶刀佩刀躍馬門前路投主黃金去不顧

車遥遥 二首

寒雞喔喔知夜半鄰翁舂梁婦炊飯僕夫聞雞趣車起
欲明未明行十里火輪飛出扶桑霞羲和騎龍鞭日車
君看日亦無閒時我車安得常在家

車遥遙望望行塵滅但聞上車語不得下車別

秋江詞

煙渺渺碧波遠白露晞翠莎晚泛綠漪蒹葭淺美人立

一作泣

江中流暮雨帆檣江上舟夕陽簾櫳江上樓舟中

采蓮紅蕩香樓前踏翠芳草愁芳草愁西風起芙蓉花
落秋水江白如練月如洗醉下煙波千萬里

陳卧子云
輕秀之詞

不傷古質
所以大雅

雙燕篇

雙燕何翩翩飛去仍徊翔依依止画閨繾綣鳴東廂昔
來屆陽節今去易寒涼祇恐秋風高海路多煙霜雙飛

入君戶雙棲在君梁被蒙君仁惠彈射不相妨養雛毛羽成送雛還故鄉雖無黃雀報歲願巢君堂

種麻篇

種麻冀滿丘種葵冀滿園孤生易憔悴獨立多憂患當行思故旅當食思故歡先機失所豫臨事多嗟歎升簫艾乃至鉏桂致傷蘭物理有相附疇能識其端斷金俟同志抱玉難自宣交結良匪易君當圖未然

陳卧子云
陳思君子

之道

易水行

寒風夕吹易水波漸離擊筑荆卿歌白衣灑淚當祖路
日落登車去不顧秦王殿上開地圖舞陽色沮那敢呼
手持匕首摘銅柱事已不成空罵倨噫嗟嗟燕丹寡謀
當滅身光也自刎何足云惜哉枉殺樊將軍

莫羅燕

羅雀莫羅燕燕飛在高殿殿高且深誰得見主人垂幕
高殿中燕來徘徊不敢通楊花落燕出啄童子張羅逐

黃雀黃雀入羅燕入幕

明月篇

有序

僕始讀杜子七言詩歌愛其陳事切實布辭沉著鄙心竊效之以爲長篇聖於子美矣既而讀漢魏以來歌詩以唐初四子者之所爲而反復之則知漢魏固承三百篇之後流風猶可徵焉而四子者雖工富麗去古遠甚至其音節往往可歌乃知子美辭固沉著而調失流轉雖成一

家語實則詩歌之變體也夫詩本性情之發者

也其切而易見者莫如夫婦之間是以三百篇

首乎雝鳩六義首乎風而漢魏作者義關君臣

朋友辭必託諸夫婦以宣鬱而達情焉其旨遠

矣由是觀之子美之詩博涉世故出於夫婦者

常少致蕪雅頌而風人之義或缺此其調反在

四子之下與暇日爲此篇意調若髣髴四子而

才質猥弱思致庸陋故摘詞蕪柰無復統飭姑

錄之以俟審聲者裁割焉

陳卧子云此序
深得風人之旨

長安月離離出海嶠遙見層城隱半輪漸看阿閣銜初
照灝豔黃金波團團白玉盤青天流影披紅蕊白露含
輝汎紫蘭紫蘭紅蕊西風起九衢夾道秋如水錦幌高
褰香霧濃瑣闥斜映輕霞舉霧沉霞落天宇開萬戶千
門月明裏月明皎皎陌東西柏寢宮堯望不迷侯家臺
榭光先滿戚里笙歌影乍低濯濯芙蓉生玉沼娟娟楊
柳覆金隄鳳凰樓上吹簫女蟋蟀堂中織錦妻別有深

宮閉深院年年歲歲愁相見金屋螢流長信階綺櫳燕
入昭陽殿趙女通宵侍御牀班姬此夕悲團扇秋來明
月照金微榆黃沙白路逶迤征夫塞上行憐影少婦窗
前想画省上林鴻鴈書中恨北地關山笛裏悲書中笛
裏空相憶幾見盈虧淚霑臆紅閨貌減落春華玉門腸
斷逢秋色春華秋色遞如流東家怨女上妝樓流蘇帳
卷初安鏡翡翠簾開自上鉤河邊織女期七夕天上嫦
娥奈九秋七夕風濤還可渡九秋霜露迴生愁九秋七

夕須臾易盛年一去真堪惜可憐揚彩入羅幃可憐流
素凝瑤席未作當壚賣酒人難邀隔坐援琴客客心對
此歎蹉跎烏鵲南飛可奈何江頭商婦移船待湖上佳
人挾瑟歌此時憑闌垂玉箸此時滅燭斂青蛾玉箸青
蛾苦緘怨緘怨含情不能吐麗色春妍桃李蹊遲輝晚
媚菖蒲浦與君相思在二八與君相期在三五空持夜
被貼鴛鴦空持暖玉擎鸚鵡青衫泣掩琵琶絃銀屏忍
對瑩簇語瑩簇再彈月已微穿廊入闥靄斜暉歸心日

遠大刀折極目天涯破鏡飛

沈道初云精神韻調駸駸少陵而方駕王盧

詩話初唐四子體今人棄之若土苴矣然其音節宛轉從六朝樂府中來初學者正不可不知也仲默明月篇擬議頗工未隋惡道子美詩云王楊盧駱當時體輕薄爲文哂未休爾曹身與名俱滅不廢江河萬里流其論詩之指若此然則初唐亦豈可盡廢乎

送張子

我視人之疾如裁我躬勿曰行弗動勿曰言弗用勿曰

我寡憚彼有衆

顧文玉云章法自樞杖二銘來

清平令

清平縣之令不識何爲者庭前長野桑庭後長山櫟猛
虎上我城青猱啼我舍昨日出城去騎馬到部下部民
道遮之持刀殺其馬入門顧妻子所居無完瓦秋風吹
樹木白日落原野永夜空城中哀哀淚如瀉

平越

清晨發平越霧暗山益密僕夫各相戒路遠恐迷失薄
午游氣清參差衆峰出雞鳴溪谷中始見厓上日雲葉
分杳冥高原被華實秋風起叢林興感乃非一悠悠遠

行邁歷險難具述

城南婦行

城南有寡婦見客泣數行自言良家女少小藏閨房青
春嬌素手白日照紅妝父母偏見憐嫁我不出鄉前年
彌魯亂腥穢入我堂弟兄各戰死親戚俱陳亡嗟哉華
豔質忍恥罹兇強憂愁雲髮變辛苦朱顏傷昨聞故夫
在消息通兩方百金贖我身三年歸舊疆歸來門巷異
人少蓬蒿長轉盼夫亦死兒女空在旁薄田無耕犢寒

臘無完裳人生固有命妾獨遭此殃況復官軍至燒焚
廬井荒主將貪賄賂百死不一償朝廷自有法出師亦
有名妾身何足道無乃乖天常

泊雲陽江頭玩月

扁舟泊沙岸皓月出翠嶺開窗鑒清輝照我孤燭冷高
林散疎光遠渚接餘景縱橫銀漢迴三五玉繩耿弦望
幾更易客行尚殊境佳期邈山嶽端坐令人省

沈山子
云詩品

在大小

謝之間

五平五仄體

秋原何蕭蕭耳目去雜茸枯荷猶穿塘苦瓠尚抱隴寒
風吹空林落日照古冢徘徊觀陳蹤露下髮忽竦

孫豹人云

風雅互作雜體竝生五平五仄亦具體也此詩不見平
仄之迹乃運思之神更有七平七仄如吐舌萬里唾四
海七變入白米出甲離桂飛髻
垂纖羅梨花梅花參差開是也

七夕

逝節忽不處佳夕復我臨神飈汎光蕙渥露霑華林緬
彼牛女會茲端竟難謀形影懽相望胡由接徽音飄飄

翠龍駕騁歸青瑤簪長河坐移轉素波斂西沉靈彩歛
以晦游雲起層陰同歡戀膠漆異處悲辰參翹思慕遠
匹感此涕流衿

陳卧子云微詞
雅奏不減惠連

十三夜對月

閒居愛明月良節復與俱金魄麗秋闌皓彩揚雲衢澄
空斂霜煙清飈蕩中區徘徊廣庭內改席臨方除顧景
怵衷慮興心念居諸天道遞消長戒之在須臾懷謙可
久安盛滿豈恒居孰云質靡盈所貴光不渝

十四夜同清溪子對月

林塘枉佳客待月欣舉觴今夕勝昨夕已見生東方離
離絳霄側冉冉素雲揚踰時灝氣徹縣耀天中央仰視
渺難即忽覺在我旁清池含微波左右浥流光月行固
當望人會何能常與子各鄉域邂逅臨此堂良時不屢
值明月安可忘醉歌荅永夕和我窈窕章

十六夜月

日夕城煙斂列宿出復多開軒望明月展席流素波員

輝雖少虧猶能遍天涯單居

一作
說

不爲樂念遠徒咨嗟

美人越崇京高樓結綺霞浮雲暮長征何由覩光華迅
颺萬里至霜霧日以加坐憂桂枝歇委落同泥沙清輝
苟相照豈慮天路遐

十七夜月

更深月復明揚秀青雲端浮颺倏以寂長川靜波瀾徘徊
廣除下白露棲崇蘭仰見城西樓迴光照文軒樓中
織綺女延頸獨哀歎哀歎未終已素河橫西山逝魄不

長望玉貌寧久妍君毋吝光惠使我芳歲闌

擣衣

涼飈吹閨闥夕露淒錦衾言念無衣客歲暮方寒侵皓
腕約長袖雅步飾鳴金寒機裂霜素繁杵叩清砧哀音
緣雲發斷響隨風沉顧影惜流月仰盼悲橫參路長魂
屢徂夜久力不任君子萬里身賤妾萬里心燈前擇妙
匹運思一何深裁以金剪刀縫以素絲鍼願爲合歡帶
得傍君衣襟

陳卧子云蕙心蘭質綺羅如在元美所謂却扇一顧時也

擬古詩 四首

名都有高樓上入青雲端修城延曲隅阿閣交重闌佳
人理清曲當戶橫朱絃揚音采霞裏令顏誰不觀賓客
會四座絲竹哀且繇日中車馬至薄暮皆來還聽曲各
言好知音良獨難

淒淒仲秋日百卉腓以殘涼風入階樹零露摧庭蘭明
月皎東壁昆蟲鳴草間孤鴻暮安適哀音揚雲端眷言
平生友振翮起一作蕩孤騫遺我若逝波望子如高山託

忱在終始蓄久諒逾宣寸心不可移磐石誰謂堅

人生百年內胡為形所役登高覽九原但見松與柏徘徊故里間念我平生戚斗酒相存問度阡復逾陌上堂展殷勤華燈永今夕何必傾庶羞濁沽聊與適朱顏難可常鬢髮會當白徧觀四海人誰爲不死客良時弗為歡衰暮歎何益死者長不作生者長不息日月更相送萬古安所極素絲有蒼黃岐路多南北在家常相問出門安可測落木歸本根飛鳥戢羽翼客游在萬里終當

還故域

緜霜降秋夜膏火寒無光淒風舉帷幄素月流中房客

行在殊境

一作君子
事行役

獨處誰與將仰視天上星羅列皆

成行牛女獨何辜
玆玆守河梁嗟無臨
風翼欲去不得
翔引領長太息涕泗徒霑裳

贈王文熙

行子夜中起月沒星尚爛天明出城去暮薄長河岸
艸際人獨歸煙中鳥初散解纜忽以遙川光夕凌亂

津市打魚歌

大船戕戕繫江岸
鮎魴鱖收百萬
小船取速不取多
往來拋網如擲梭
野人無船住水滸
織竹爲梁數如罟
夜來水長沒沙背
津市家家有魚賣
江邊酒樓燕估客
割鱖斫鱠不論百
楚姬玉手揮雙刀
雪花錯落金盤高
鄰家思婦清晨起
買得蘭江一雙鯉
篊篊紅尾三尺長
操刀具案不忍傷
呼童放鯉撇波去
寄我素書向郎處

陳卧子云
調古詞俊

偏橋行

城頭日出一丈五偏橋長官來擊鼓山南野苗聚如雨
三尺行箭七尺弩朝出射人夜射虎男解蠻歌女解舞
殺血祈神暗乞蠱沙蒸水毒草根苦上山下山那敢戲
蠢爾苗民爾毋侮虞庭兩階列干羽

寄李空同

黃河臘月冰十丈縱有鯉魚那得上楚天鴻鴈避霜雪
未得逢春難北向康王城邊沙草曛梁王臺上多暮雲

野人歲晚誰相對桐柏山中空憶君

陳卧子
云盛唐

官倉行

長棘周袤三丈垣高門鐵鎖緘兩關黃鬚碧衫下敷吏
白板朱書十行字帳前喧呼朝不休剪旌分隊聽唱籌
富家得粟堆如丘大車檻檻服兩牛鄉間餓夫立牆下
稍欲近前遭吏罵

吳偉江山圖歌

吳偉老死不可見人間畫史空嗟羨吾觀此卷江山圖

飄然意象臨虛無想當濡毫拂絹素酒酣落筆神骨露
萬里青天動海岳空堂白日流雲霧洲傾岸側波嶺銜
島嶼倒影翻源潭江邊萬舸一時發中流颼颼開風帆
崩濤湧浪勢難久漁子舟人各回首去鴈遙知七澤中
落花誤認三江口煙峰蒼茫貌二叟面髮衣冠頗麤醜
石林沙草恣點染舒卷滄洲在吾手憶昨弘治間偉藝
實絕倫供奉曾逢萬乘主招邀數過諸侯門京師豪貴
競迎致失意往往遭訶嗔由來能事負性氣輒軻貧賤

終其身嗚呼吳生不復得剩水殘山轉悽惻此卷流傳
天地間我即見汝真顏色

吳偉飛泉畫圖歌

長安獨過田子舍留我一翫飛泉畫絕壁如聞風雨來
晴天安得蛟龍挂吳生跌宕得畫理潦草落筆皆可喜
飛泉却出沓嶂間山即真山水真水客堂六月生晝寒
耳中髣髴高江灘源潭窈窕不可測波浪洶湧多奇觀
泉邊二老顏色異偶坐似是莊與惠萬里誰論到海心

百年詎識臨淵意偉哉田子今儒宗文標南指匡廬峰
不須對此更惆悵會觀瀑布青天上杉風松日隔縹緲
雲瀧雪灝何雄壯我常夢往神空向豈無吳生好手筆
爲我寫寄廬山障

吳明卿云氣韻生動畫
中山水人物歷歷如覩

画魚

大魚昂藏若人立衝波跋浪風江急旁觀二鯉各有神
倏忽波濤隨出入中堂鬚鬣動杳冥坐久始識爲丹青
青天萬里拂絹素筆力咫尺開滄溟禹門天池雲霧裏

白晝雷霆行地底何人有力移置此酒酣相視一改容

只愁化作三蛟龍

楊用修云雄奇排宕直踞少陵之壘可奪獻吉之幟

子昂畫馬歌

學士宋王孫畫馬皆龍姿曾寫飛黃出天廐尚留雲影
落瑤池池頭馬官錦鞞袴緩鞚長牽時拂顧萬里精神
開絹素百年馬鬣生風霧吁嗟內乘無人識想見奔騰
過都國翠仗朱軒數往來金羈玉勒增顏色只今天子
罷南征又聞東巡遼海城安得四馬忽然生登臺一顧

千金輕天上長隨八駿行

鄭平子云仲默画馬二篇比之杜陵雄偉少遜而逸宕有

餘

画馬行

画馬如画龍縱橫變化當無窮
吾觀月山子落筆窺神工
曾向天閑貌十萬十萬意態無一同
此馬傳來幾百年古絹猶開沙漠風
樹裏河流新過雨簇簇草芽寒刺水
園人雙牽臨水邊草色離離亂雲綺
令人疑到渥洼旁波底風雷鬬龍子
細看不是白鼻騮恐是當朝獅子

花紫燕纖離各惆悵其餘駑劣何足誇憶昔愛馬不惜
千金貨君王勤政樓頭坐奚奴黃衫雙繡韉殿中騎出
樓前過紅帕初籠汗血香玉鞭輕拂桃花破吁嗟玩物
竟何益遺跡徒使丹青播只今烽火西北來沙場未聞
千里才千里才固有時回頭爲問御者誰君不見古人
養馬如養士一飽能酬千里志今人養馬如養豚殿下
常摧疾藜刺古之良馬何代無可笑今人空按圖

詩話仲默題畫諸篇源出

杜陵匪徒貌似神亦似之

辰溪縣

早發辰溪渡清川喜泛舟山城敲粉堞江驛映朱樓雨
驟沙頽岸天寒水露洲蠻音聞漸異迢遞動鄉愁

峽中

自昔偏安地于今息戰侵江穿巫峽隘山鑿鬼門深濁
浪魚龍黑寒天日月陰夜猿啼不盡淒斷故鄉心

月

片月中秋近輝光一歲無天清驚塞鴈夜冷落楓烏不

寐知宵永無言對影孤更深何處沒萬里墮江湖

殿試宿禮部和馬張二光祿喬直閣諸公

東閣春朝晚南宮夜宿深鎖闌猶月色開閣更松陰地

迴神仙接天低象緯臨諸君清廟作三歎有餘音

蔣春甫云

下字虛實俱鍊

懷沈子

沈生南國去別我獨悽然落日清江樹歸人何處船十年安陸舍數口太湖田想到鄉園日生涯亦可憐

沈山子云

極似

襄陽

十四夜

水際浮雲起孤城日暮陰萬山秋葉下獨坐一燈深白露蒹葭落西風蟋蟀吟關山今夜月橫笛有哀音

送曹端卿謫尋甸

逐客滇南郡雲天此路長高秋行萬里落日淚千行作賦投湘水題書寄夜郎殊方氣候異去矣慎風霜

陳卧
子云

似高

常侍

九日夜過劉以正別士奇

重陽愁獨酌深夜喜相過
萬里惟秦客三杯亦楚歌
霜笳沈海月風鴈起滹沱
醉別黃花去能忘白玉珂

送彭總制之西川

蜀道青天上岷山赤日西
九重連授鉞萬里動征輦
開府松杉靜懸軍玉壘低
知公安蜀計諸葛大名齊

楊用修云

森嚴莊重

得五清先生客澧州消息
悵然有懷

憔悴東都士吾師更可嗟三年爲逐客萬里未還家暮
阻巴山雪春行楚岸花江湖無路覓流涕望天涯

詩話五清先生內江人南京禮部右侍郎贈尚
書謚文肅劉公瑞也字曰德符山東按察僉事
時數之子中弘治丙辰進士正德丁丑以按察
副使提督浙江學政明年六月廣購經史子集
發十一府儒學公貯備覽每冊隸書於序尾鈐
以關防今各府俱散佚人間子每每見之惟湖
州府學尚多存者予家所抄施宿張誤會稽二
志乃其所儲本也又嘗於岷山建三賢祠以祀
唐刺史顏公真卿宋知州事蘇公軾王公十朋
則己卯年事也留心風教若此可謂克盡其職
儻學使者悉如公所爲士風吏治何難丕變予
以爲三賢祠在宜作粟主并祀公斯則賢有司

之責矣公有五清先生集十八卷又
外臺集六卷訪之未獲故附識於此

關門

虎衛關門迴龍沙塞曲深風雲時有氣日月晝長陰中

使西來訊千官北望心天寒漢宮闕翠蓋憶春臨

吳明卿云

氣骨清蒼 陳卧子云
似武皇在宣府時作

觀兵 二首

將帥俱分閫朝廷再剖符選徒皆虎士戰馬盡龍駒直
指黃河外長驅碧海隅感恩須此輩萬一爲捐軀

組練回天地
戈鋌白日搖
王師一奮怒
寇賊可潛消
使過傳金節
軍行奏玉簫
人言漢家將
今是霍嫖姚

登堅山寺

西風插天起
絕頂寺門開
雲裏一僧住
山中無客來
落花平講席
積草徧香臺
我欲聞清梵
焚香坐不回

武關

北轉趨劉壩
西盤出武關
微茫一線路
廻合萬重山
天地幾龍戰
風雲惟鳥還
關門鎖溪水
日夜送潺湲

中秋無月

月賞今年罷高樓獨客愁關山中夜笛江漢故鄉舟暗
雨捎檐入秋螢度檻流應知雲霧上天柱有人遊

昭烈廟

漂泊依劉計間闕入蜀身中原無社稷亂世有君臣峽
路元通楚岷江不向秦空山一祠宇寂寞翠華春

黃清甫云

匪值侗詞
亦存名教

豔曲

御溝連上苑大道接平沙紫陌三千騎青樓十萬家城
中楊柳樹風起暮飛花

武昌聞邊報

傳聞曠騎近長安北伐朝廷已命官路繞居庸烽火暗
城高山海戍樓寒一時邊將當關少六月王師出塞難

先帝恩深能養士請纓誰爲繫樓蘭

姚仙期云孝宗御
煖閣語輔臣劉健

云臨陣以軍法從事所擬太重恐邊將
起輕殺之漸此亦恩深能養士之一也

溪上

溪上茅齋不掩扉
西風初罷芰荷衣
月寒沙柳蕭蕭落
天晚江鴻肅肅飛
野客行吟水邊立
家人沽酒夜深歸
相逢醉語休辭數
城外黃花漸覺稀

荅雷長史

十載寒羶鄭畫師
風流文采更堪思
朱門鼓瑟官仍達
青殿揮毫出每遲
百里風煙還薄暮
孤城雨雪已多時
極知歲晚傷心切
起傍官梅自詠詩

聞河南寇

檄書近報河南寇楚塞梁關轉戰空豈有兵車能遠救
即愁道路阻難通江淮城塹西南險嵩洛山川天地中
今日至尊憂不細幾時諸將捷音同

西海子

寺下煙波春不開苑中風浪隱樓臺泉源細繞西山出
雲氣深從北極來萬里垂查觀日月十年登閣望蓬萊
黃塵碧水須臾事莫使魚龍夜夜哀

吳明卿云雄渾道
逸陳卧子云意

景皆摹

少陵

小閣初開崔郭田三君子至

本買堂齋爲客居敢扳冠蓋枉吾廬清風坐下高人榻
深夜門停長者車竹下涼蟾輝几杖花間螢火靜琴書
黃門翰苑俱鄰近濁酒盤餐意不疎

移敬甫云風致如
月出石渠芙蓉散

華

送雷長史

彤管先朝隨帝子白頭今日奉王孫漢庭亦羨相如美
楚客重看賈傅尊花下圖書開玉殿日高琴瑟在朱門

十年亭閣淮西宴腸斷梁王雪夜樽

陳卧子云潦倒遲暮寫得可念

得獻吉江西書

近得潯陽江上書遙思李白更愁予
天邊魑魅窺人過日暮黿鼉傍客居
鼓柁襄江應未得買田陽羨定何如
他年淮水能相訪桐柏山中共結廬

送施聘之侍御

海甸春風攬轡情燕關驄馬去還鳴
繡衣霄漢花間出錦纜江湖樹裏行
近日西臺多諫草少年南國有詩名

別絃更憶風流調愁聽東城二月鶯

宗子相云綺語逸韻恍對玉謝風流

鮒魚

五月鮒魚已至燕荔支盧橘未應先賜鮮徧及中璫第
薦熟誰開寢廟筵白日風塵馳驛騎炎天冰雪護江船
銀鱗細骨堪憐汝玉箸金盤敢望傳

送衛推官之武昌

少年佐郡楚城居十郡風流盡不如此去且隨彭蠡鴈
何須不食武昌魚仙人樓閣春雲裏賈客帆檣落照餘

大別山前江漢水，畫簾終日對清虛。

穆敬甫云：風度若鯉，躍晴波，鳥鳴春。

谷

獨立

獨立對花陰，冥冥望河渚。只見沙上煙，不見煙中雨。

鰲屋清明日

獨樹桃花自發高，樓燕子誰家可惜年。年春色催人白髮天涯。

江南思

燈下雨鳴秋舫浦口潮迴暮鐘何處相思不見江南開
徧芙蓉

送韓汝慶還關中

華岳雲臺萬里情高秋落日眺秦城黃河一線通滄海
身在仙人掌上行

秋日雜興 二首

野亭千橘未全黃青柿紅梨盡待霜南鄰老翁種橡栗
已見兒童收滿牀

紫蔓青藤各一叢野人籬落管西風郊扉遠絕誰能到
秋日蟲鳴豆葉中

明詩綜卷三十五